

# 楚辞



〔西汉〕刘向辑录

楚

辞

## 楚辞方框对应字一览表

页码	对应文字(如果一页方框太多,按其出现的先后顺序排列)		
第 6 页	谯 陔	第 7 页	蜀 簪
第 11 页	酈	第 14 页	莖 筮
第 17 页	踈 蓺	第 19 页	嚳 嚳
第 24 页	溲 䟽	第 26 页	醜
第 34 页	笱	第 35 页	夔
第 36 页	褻	第 37 页	嚳 嚳
第 38 页	嚳	第 40 页	芊
第 41 页	粵 菀	第 43 页	嚳 縻
第 44 页	芊	第 45 页	歛 黠 黠

## 《楚辞》导读

《楚辞》是继《诗经》之后出现的又一部深有影响的诗歌总集。西汉末年,著名学者刘向辑录屈原、宋玉及淮南小山、东方朔、王褒等人的辞赋而成。

“楚辞”名称,西汉初年已有,指的是战国时代以屈原为代表的楚人创作的诗歌。楚辞是《诗经》之后出现的一种新诗体,其出现和发展与楚地文化的发展、与战国时代急剧的社会变革和文化上的空前繁荣有着密切的关系。楚辞的创作,带有浓厚的地方色彩。楚地一些较早的民歌,如《楚人歌》、《越人歌》、《沧浪歌》等,歌词末尾以“兮”作为语助词,这一特点成为后来楚辞的句式形式。楚俗信鬼好祀,巫风极盛,民间祭祀,必使巫者载歌载舞以娱诸神,这种充满宗教气氛的巫风,也直接影响了楚辞的创作。屈原《九歌》中的祭神曲《招魂》中的女巫下降招魂,《离骚》中的巫神和内美外修、庄严华丽的自我形象的描述等,都是楚地习俗在诗歌创作中的反映。所有这一切,都使《楚辞》赋予了一重奇异神秘的色彩。

楚辞的最具代表性的诗人是屈原。屈原的独特遭遇和其艺术上的卓越才能,使他的创作成为我国古代诗歌史上的一座丰碑。屈原的作品中申述了他的政治主张和对美好理想的不懈追求,表现了他对邪恶势力的憎恶,对苦难的人民的关切,对祖国前途命运的忧虑和以身殉国的爱国之情。屈原的诗歌,感情炽热,想象丰富,波澜壮阔,结构完美,形象鲜明,辞采绚烂,充满着浪漫主义精神。他的《离骚》可以说是《楚辞》的代表作品。诗篇内容

丰富结构完整,句式以六言为主,是文学样式的一种新创。诗中创造了一个个幻想境界,驱使大量的神话和传说中的人物,以及日月风雷、鸾凰凤鸟、伴同自己去漫游天国。诗篇洋溢着浓郁的浪漫主义色彩,极为奇伟。为楚辞的创作开拓了新的领域。

《楚辞》开了我国古代诗歌浪漫主义的创作道路,这与《诗经》开辟的现实主义创作道路同样具有极深远的意义。《楚辞》与《诗经》被后人并称为《风骚》,是我国文学史上最早出现的并峙双峰、奇绝之作。

## 离 骚

帝高阳之苗裔兮，朕皇考曰伯庸。  
摄提贞于孟陬兮，惟庚寅吾以降。

皇览揆余初度兮，肇锡余以嘉名。  
名余曰正则兮，字余曰灵均。

纷吾既有此内美兮，又重之以修能。  
扈江离与辟芷兮，纫秋兰以为佩。

汨余若将不及兮，恐年岁之不吾与。  
朝搴阰之木兰兮，夕揽洲之宿莽。  
日月忽其不淹兮，春与秋其代序。  
惟草木之零落兮，恐美人之迟暮。

不抚壮而弃秽兮，何不改乎此度？  
乘骐骥以驰骋兮，来吾道夫先路！

昔三后之纯粹兮，固众芳之所在；  
杂申椒与菌桂兮，岂维纫夫蕙茝？  
彼尧舜之耿介兮，既遵道而得路。  
何桀纣之猖披兮，夫唯捷径以窘步。  
惟夫党人之偷乐兮，路幽昧以险隘。  
岂余身之惮殃兮，恐皇舆之败绩！

忽奔走以先后兮，及前王之踵武。  
荃不察余之中情兮，反信谗而齐怒。  
余固知謇謇之为患兮，忍而不能舍也。  
指九天以为正兮，夫唯灵修之故也！  
初既与余成言兮，后悔遁而有他。  
余既不难夫离别兮，伤灵修之数化。

余既滋兰之九畹兮，又树蕙之百亩。  
畦留夷与揭车兮，杂杜衡与芳芷。  
冀枝叶之峻茂兮，愿俟时乎吾将刈。

虽萎绝其亦何伤兮，哀众芳之芜秽。

众皆竞进以贪婪兮，凭不厌乎求索。  
羌内恕己以量人兮，各兴心而嫉妒。  
忽驰骛以追逐兮，非余心之所急。  
老冉冉其将至兮，恐修名之不立。  
朝饮木兰之坠露兮，夕餐秋菊之落英。  
苟余情其信姱以练要兮，长颀颀亦何伤！

揽木根以结茝，贯薜荔之落蕊。  
矫菌桂以纫蕙兮，索胡绳之緜緜。  
謇吾法夫前修兮，非世俗之所服。  
虽不周于今之人兮，愿依彭咸之遗则！

长太息以掩涕兮，哀民生之多艰。  
余虽好修姱以鞿鞢兮，謇朝谇而夕替。  
既替余以蕙纒兮，又申之以揽茝。  
亦余心之所善兮，虽九死其犹未悔！  
怨灵修之浩荡兮，终不察夫民心。  
众女嫉余之蛾眉兮，谣诼谓余以善淫。  
固时俗以工巧兮，偃规矩而改错。  
背绳墨以追曲兮，竞周容以为度。

饨郁邑余佗傺兮，吾独穷困乎此时也！  
宁溘死以流亡兮，余不忍为此态也！  
鸷鸟之不群兮，自前世而固然。  
何方圜之能周兮，夫孰异道而相安！  
屈心而抑志兮，忍尤而攘诟。  
伏清白以死直兮，固前圣之所厚！

悔相道之不察兮，延伫乎吾将反。  
回朕车以复路兮，及行迷之未远。  
步余马于兰皋兮，驰椒丘且焉止息。

进不入以离尤兮，退将复修吾初服。

制芰荷以为衣兮，集芙蓉以为裳。  
不吾知其亦已兮，苟余情其信芳。  
高余冠之岌岌兮，长余佩之陆离。  
芳与泽其杂糅兮，唯昭质其犹未亏。

忽反顾以游目兮，将往观乎四荒。  
佩缤纷其繁饰兮，芳菲菲其弥彰。  
民生各有所乐兮，余独好修以为常。  
虽体解吾犹未变兮，岂余心之可惩！  
女嬃之婞媛兮，申申其詈余。  
曰：“鲧婞直以亡身兮，终然殀乎羽之野。  
汝何博謇而好修兮，纷独有此姱节？  
菹菹蒺以盈室兮，判独离而不服？  
众不可户说兮，孰云察余之中情？  
世并举而好朋兮，夫何茷独而不予听？”

依前圣以节中兮，喟凭心而历兹。  
济沅湘以南征兮，就重华而陈词：

“启九辩与九歌兮，夏康娱以自纵。  
不顾难以图后兮，五子用失乎家巷。  
羿淫游以佚畋兮，又好射夫封狐。  
固乱流其鲜终兮，浞又贪夫厥家。  
浇身被服强圉兮，纵欲而不忍。  
日康娱而自忘兮，厥首用夫颠隕。  
夏桀之常违兮，乃遂焉而逢殃。  
后辛之菹醢兮，殷宗用而不长。  
汤禹俨而祗敬兮，周论道而莫差。  
举贤而授能兮，循绳墨而不颇。”

“皇天无私阿兮，览民德焉错辅。  
夫维圣哲以茂行兮，苟得用此下土。  
瞻前而顾后兮，相观民之计极。  
夫孰非义而可用兮，孰非善而可服？”  
“阼余身而危死兮，览余初其犹未悔。  
不量凿而正枘兮，固前修以菹醢。”

曾歔歔余郁邑兮，哀朕时之不当。  
揽茹蕙以掩涕兮，沾余襟之浪浪。

跪敷衽以陈辞兮，耿吾既得此中正。  
骖玉虬以乘兮，溘埃风余上征。

朝发轫于苍梧兮，夕余至乎县圃。  
欲少留此灵琐兮，日忽忽其将暮。  
吾令羲和弭节兮，望崦嵫而勿迫。  
路曼曼其修远兮，吾将上下而求索。

饮余马于咸池兮，总余轡乎扶桑。  
折若木以拂日兮，聊逍遥以相羊。  
前望舒使先驱兮，后飞廉使奔属。  
鸾皇为余先戒兮，雷师告余以未具。  
吾令凤鸟飞腾兮，继之以日夜。  
飘风屯其相离兮，帅云霓而来御。  
纷总总其离合兮，斑陆离其上下。

吾令帝阍开关兮，倚阍阖而望予。  
时暖暖其将罢兮，结幽兰而延伫。  
世溷浊而不分兮，好蔽美而称恶。  
朝吾将济于白水兮，登阊风而马。  
忽反顾以流涕兮，哀高丘之无女。

溘吾游此春宫兮，折琼枝以继佩。  
及荣华之未落兮，相下女之可诒。  
吾令丰隆乘云兮，求宓妃之所在。  
解佩纕以结言兮，吾令蹇修以为理。  
纷总总其离合兮，忽纬緌其难迁。  
夕归次于穷石兮，朝濯发乎洧盘。  
保厥美以骄傲兮，日康娱以淫游。  
虽信美而无礼兮，来违弃而改求。

览相观于四极兮，周流乎天余仍下。  
望瑶台之偃蹇兮，见有娥之佚女。  
吾令鸩为媒兮，鸩告余以不好。

雄雉之鸣逝兮，余犹恶其佻巧。  
必犹豫而狐疑兮，欲自适而不可。  
凤皇既受诒兮，恐高辛之先我。

欲远集而无所止兮，聊浮游以逍遥。  
及少康之未家兮，留有虞之二姚。  
理弱而媒拙兮，恐导言之不固。

世溷浊而嫉贤兮，好蔽美而称恶。  
闺中既以邃远兮，哲王又不寤。  
怀朕情而不发兮，余焉能忍与此终古！  
索藁茅以筮樵兮，命灵氛为余占之。  
曰：“两美其必合兮，孰信修而慕之？  
思九州之博大兮，岂唯是其有女？”

曰：“勉远逝而无狐疑兮，孰求美而释女？  
何所独无芳草兮，尔何怀乎故宇？  
世幽昧以眩曜兮，孰云察余之善恶？  
民好恶其不同兮，惟此党人其独异。  
户服艾以盈要兮，谓幽兰其不可佩。  
览察草木其犹未得兮，岂理美之能当？  
苏粪壤以充帙兮，谓申椒其不芳。”

欲从灵氛之吉占兮，心犹豫而狐疑。  
巫咸将夕降兮，怀椒糈而要之。

百神翳其备降兮，九疑缤其并迎。  
皇剡剡其扬灵兮，告余以吉故。  
曰：“勉升降以上下兮，求矩矱之所同。  
汤禹严而求合兮，挚咎繇而能调。  
苟中情其好修兮，又何必用夫行媒。  
说操筑于傅岩兮，武丁用而不疑。  
吕望之鼓刀兮，遭周文而得举。  
宁戚之讴歌兮，齐桓闻以该辅。  
及年岁之未晏兮，时亦犹其未央。  
恐鸱之先鸣兮，使夫百草为之不芳。”  
何琼佩之偃蹇兮，众萋然而蔽之。  
惟此党人之不谅兮，恐嫉妒而折之。

时缤纷其变易兮，又何可以淹留。  
兰芷变而不芳兮，荃蕙化而为茅。  
何昔日之芳草兮，今直为此萧艾也？  
岂其有他故兮，莫好修之害也。

余以兰为可恃兮，羌无实而容长。  
委厥美以从俗兮，苟得列乎众芳。  
椒专佞以慢慝兮，椒又欲充夫佩帙。  
既干进而务入兮，又何芳之能祗？  
固时俗之流从兮，又孰能无变化？  
览椒兰其若兹兮，又况揭车与江离！  
惟兹佩之可贵兮，委厥美而历兹。  
芳菲菲而难亏兮，芬至今犹未沫！

和调度以自娱兮，聊浮游而求女。  
及余饰之方壮兮，周流观乎上下。

灵氛既告余以吉占兮，历吉日乎吾将行。  
折琼枝以为羞兮，精琼以为粢。  
为余驾飞龙兮，杂瑶象以为车。  
何离心之可同兮，吾将远逝以自疏。

遭吾道夫昆仑兮，路修远以周流。  
扬云霓之晻蔼兮，鸣玉鸾之啾啾。  
朝发轫于天津兮，夕余至乎西极。  
凤皇翼其承旂兮，高翱翔之翼翼。  
忽吾行此流沙兮，遵赤水而容与。  
麾蛟龙使梁津兮，诏西皇使涉余。  
路修远以多艰兮，腾众车使径待。  
路不周以左转兮，指西海以为期。  
屯余车其千乘兮，齐玉轡而并驰。  
驾八龙之婉婉兮，载云旗之委蛇。  
抑志而弭节兮，神高驰之邈邈。  
奏九歌而舞韶兮，聊假日以愉乐。

陟升皇之赫戏兮，忽临睨夫旧乡。  
仆夫悲余马怀兮，蜷局顾而不行。

乱曰：已矣哉！



国无人莫我知兮，又何怀乎故都？

既莫足与为美政兮，吾将从彭咸之所居！

## 九 歌

### 东皇太一

吉日兮辰良，穆将愉兮上皇。  
抚长剑兮玉珥，璆锵鸣兮琳琅。  
瑶席兮玉瑱，盍将把兮琼芳。  
蕙肴蒸兮兰藉，奠桂酒兮椒浆。  
扬枹兮拊鼓，疏缓节兮安歌，  
陈竽瑟兮浩倡。

灵偃蹇兮姣服，芳菲菲兮满堂。  
五音纷兮繁会，君欣欣兮乐康。

### 云中君

浴兰汤兮沐芳，华彩衣兮若英。  
灵连蜷兮既留，烂昭昭兮未央。

謇将憺兮寿宫，与日月兮齐光。  
龙驾兮帝服，聊翱游兮周章。

灵皇皇兮既降，森远举兮云中。  
览冀州兮有余，横四海兮焉穷。  
思夫君兮太息，极劳心兮忡忡。

### 湘 君

君不行兮夷犹，蹇谁留兮中洲。  
美要眇兮宜修，沛吾乘兮桂舟。  
令沅湘兮无波，使江水兮安流。  
望夫君兮未来，吹参差兮谁思。

驾飞龙兮北征，遭吾道兮洞庭。

薜荔柏兮蕙绸，荪桡兮兰旌。  
望涔阳兮极浦，横大江兮扬灵。

扬灵兮未极，女婵媛兮为余太息。  
横流涕兮潺湲，隐思君兮徘徊。

桂櫂兮兰枻，斫冰兮积雪。  
采薜荔兮水中，搴芙蓉兮木末。  
心不同兮媒劳，恩不甚兮轻绝。  
石濂兮浅浅，飞龙兮翩翩。  
交不忠兮怨长，期不信兮告余以不闲。  
朝骋骛兮江皋，夕弭节兮北渚。  
鸟次兮屋上，水周兮堂下。  
捐余玦兮江中，遗余佩兮醴浦。  
采芳洲兮杜若，将以遗兮下女。  
时不可兮再得，聊逍遥兮容与。

### 湘 夫 人

帝子降兮北渚，目眇眇兮愁予。  
嫋嫋兮秋风，洞庭波兮木叶下。

登白蘋兮骋望，与佳期兮夕张。  
鸟何萃兮蘋中，罾何为兮木上。

沅有茝兮醴有兰，思公子兮未敢言。  
荒忽兮远望，观流水兮潺湲。

麋何食兮庭中？蛟何为兮水裔？  
朝驰余马兮江皋，夕济兮西澨。  
闻佳人兮召予，将腾驾兮偕逝。

筑室兮水中，葺之兮荷盖。

荪壁兮紫坛 ,播芳椒兮成堂。  
桂栋兮兰橑 ,辛夷楣兮药房。  
罔薜荔兮为帷 ,擗蕙櫜兮既张。  
白玉兮为镇 ,疏石兰兮为芳。  
芷葺兮荷屋 ,缭之兮杜衡。

合百草兮室庭 ,建芳馨兮庑门。  
九疑缤兮并迎 ,灵之来兮如云。

捐余袂兮江中 ,遗余褋兮醴浦。  
搴汀洲兮杜若 ,将以遗兮远者。  
时不可兮骤得 ,聊逍遥兮容与。

### 大司命

广开兮天门 ,纷吾乘兮玄云。  
令飘风兮先驱 ,使冻雨兮洒尘。

君回翔兮以下 ,逾空桑兮从女。  
纷总总兮九州 ,何寿夭兮在予。

高飞兮安翔 ,乘清气兮御阴阳。  
吾与君兮齐速 ,导帝兮九阍。

灵衣兮被被 ,玉佩兮陆离。  
一阴兮一阳 ,众莫知兮余所为。

折疏麻兮瑶华 ,将以遗兮离居。  
老冉冉兮既极 ,不寢近兮愈疏。

乘龙兮辘辘 ,高驼兮冲天。  
结桂枝兮延伫 ,羌愈思兮愁人。

愁人兮奈何 ,愿若今兮无亏。  
固人命兮有当 ,孰离合兮可为 ?

### 少司命

秋兰兮麝芜 ,罗生兮堂下。  
绿叶兮素枝 ,芳菲菲兮袭予。  
夫人兮自有美子 ,荪何以兮愁苦 ?

秋兰兮青青 ,绿叶兮紫茎。  
满堂兮美人 ,忽独与余兮目成。

人不言兮出不辞 ,乘回风兮载云旗。  
悲莫悲兮生别离 ,乐莫乐兮新相知。

荷衣兮蕙带 ,倏而来兮忽而逝。  
夕宿兮帝郊 ,君须谁兮云之际 ?

与女沐兮咸池 ,晞女发兮阳之阿。  
望美人兮未来 ,临风悦兮浩歌。

孔盖兮翠旌 ,登九天兮抚彗星。  
竦长剑兮拥幼艾 ,荪独宜兮为民正。

### 东君

暾将出兮东方 ,照吾槛兮扶桑。  
抚余马兮安驱 ,夜皎皎兮既明。

驾龙辀兮乘雷 ,载云旗兮委蛇。  
长太息兮将上 ,心低徊兮顾怀。  
羌声色兮娱人 ,观者憺兮忘归。

缙瑟兮交鼓 ,萧钟兮瑶簫。  
鸣篪兮吹竽 ,思灵保兮贤姱。  
翱飞兮翠曾 ,展诗兮会舞。  
应律兮合节 ,灵之来兮蔽日。

青云衣兮白霓裳 ,举长矢兮射天狼。  
操余弧兮反沦降 ,援北斗兮酌桂浆。

撰余辔兮高驰翔,杳冥冥兮以东行。

## 河 伯

与女游兮九河,冲风起兮横波。  
乘水车兮荷盖,驾两龙兮骖螭。

登昆仑兮四望,心飞扬兮浩荡。  
日将暮兮怅忘归,惟极浦兮寤怀。

鱼鳞屋兮龙堂,紫贝阙兮珠宫。  
灵为何兮水中?乘白鼉兮逐文鱼,  
与女游兮河之渚,流澌纷兮将来下。

子交手兮东行,送美人兮南浦。  
波滔滔兮来迎,鱼邻邻兮媵予。

## 山 鬼

若有人兮山之阿,被薜荔兮带女罗。  
既含睇兮又宜笑,子慕余兮善窈窕。

乘赤豹兮从文狸,辛夷车兮结桂旗。  
被石兰兮带杜衡,折芳馨兮遗所思。  
余处幽篁兮终不见天,路险难兮独后来。

表独立兮山之阿,云容容兮而在下。  
杳冥冥兮羌昼晦,东风飘兮神灵雨。  
留灵修兮憺忘归,岁既晏兮孰华予。

采三秀兮于山间,石磊磊兮葛蔓蔓。  
怨公子兮怅忘归,君思我兮不得闲。

山中人兮芳杜若,饮石泉兮荫松柏,  
君思我兮然疑作。

雷填填兮雨冥冥,猿啾啾兮狖夜鸣。  
风飒飒兮木萧萧,思公子兮独离忧。

## 国 殇

操吴戈兮被犀甲,车错毂兮短兵接。  
旌蔽日兮敌若云,矢交坠兮士争先。

凌余阵兮躐余行,左骖殪兮右刃伤。  
霾两轮兮絷四马,援玉枹兮击鸣鼓。  
天时坠兮威灵怒,严杀尽兮弃原野。

出不入兮往不返,平原忽兮路超远。  
带长剑兮挟秦弓,首身离兮心不怨。  
诚既勇兮又以武,终刚强兮不可凌。  
身既死兮神以灵,子魂魄兮为鬼雄。

## 礼 魂

成礼兮会鼓,传芭兮代舞。  
姱女倡兮容与。  
春兰兮秋菊,长无绝兮终古。

## 天 问

曰 遂古之初,谁传道之?  
上下未形,何由考之?  
冥昭瞢暗,谁能极之?  
冯翼惟像,何以识之?  
明明暗暗,惟时何为?

阴阳三合,何本何化?  
圜则九重,孰营度之?  
惟兹何功,孰初作之?  
斡维焉系?天极焉加?

八柱何当？东南何亏？  
九天之际，安放安属？  
隅隈多有，谁知其数？

天何所沓？十二焉分？  
日月安属？列星安陈？  
出自汤谷，次于蒙汜；  
自明及晦，所行几里？  
夜光何德，死则又育？  
厥利维何，而顾菟在腹？

女岐无合，夫焉取九子？  
伯强何处？惠气安在？  
何阖何晦？何开而明？  
角宿未旦，曜灵安藏？

不任汨鸿，师何以尚之？  
佥曰何忧，何不课而行之？  
鸱龟曳衔，鲧何听焉？  
顺欲成功，帝何刑焉？  
永遏在羽山，夫何三年不施？  
伯禹腹鲧，夫何以变化？  
纂就前绪，遂成考功。  
何续初继业，而厥谋不同？  
洪泉极深，何以填之？  
地方九则，何以坟之？  
应龙何画？河海何历？  
鲧何所营？禹何所成？  
康回冯怒，地何故以东南倾？

九州安错？川谷何洿？  
东流不溢，孰知其故？  
东西南北，其修孰多？  
南北顺椭，其衍几何？  
昆仑县圃，其安在？  
增城九重，其高几里？  
四方之门，其谁从焉？  
西北辟启，何气通焉？

日安不到？烛龙何照？  
羲和之未扬，若华何光？  
何所冬暖？何所夏寒？  
焉有石林？何兽能言？  
焉有虬龙？负熊以游？  
雄虺九首，倏忽焉在？  
何所不死，长人何守？  
靡萍九衢，臬华安居？  
一蛇吞象，厥大何如？

黑水玄趾，三危安在？  
延年不死，寿何所止？  
鲧鱼何所？魃堆焉处？  
羿焉弹日？乌焉解羽？

禹之力献功，降省下土四方。  
焉得彼涂山女，而通之于台桑？  
闵妃匹合，厥身是继。  
胡维嗜不同味，而快朝饱？

启代益作后，卒然离。 。  
何启惟忧，而能拘是达？  
皆归射，而无害厥躬？  
何后益作革，而禹播降？  
启棘宾商，九辩九歌。  
何勤子屠母，而死分竟地？

帝降夷羿，革孽夏民。  
胡射夫河伯，而妻彼雒嫫？  
冯珧利决，封豨是射。  
何献蒸肉之膏，而后帝不若？  
浞娶纯狐，眩妻爰谋。  
何羿之射革，而后交吞揆之？

阻穷西征，岩何越焉？  
化为黄熊，巫何活焉？  
咸播秬黍，莆藿是营。

何由并投 ,而鯀疾修盈 ?  
白蜺嬰葦 ,胡为此堂 ?  
安得夫良药 ,不能固臧 ?  
天式从横 ,阳离爰死。  
大鸟何鸣 ,夫焉丧厥体 ?

萍号起雨 ,何以兴之 ?  
撰体协胁 ,鹿何膺之 ?  
鳌戴山抃 ,何以安之 ?  
释舟陵行 ,何以迁之 ?

惟浇在户 ,何求于嫂 ?  
何少康逐犬 ,而颠陨厥首 ?  
女岐缝裳 ,而馆同爰止。  
何颠易厥首 ,而亲以逢殆 ?

汤谋易旅 ,何以厚之 ?  
覆舟斟寻 ,何道取之 ?  
桀伐蒙山 ,何所得焉 ?  
妹嬉何肆 ,汤何殛焉 ?

舜闵在家 ,父何以纘 ?  
尧不姚告 ,二女何亲 ?

厥萌在初 ,何所亿焉 ?  
璜台十成 ,谁所极焉 ?

登立为帝 ,孰道尚之 ?  
女媧有体 ,孰制匠之 ?

舜服厥弟 ,终然为害。  
何肆犬体 ,而厥身不危败 ?

吴获迄古 ,南岳是止。  
孰期去斯 ,得两男子 ?

缘鹄饰玉 ,后帝是飨。  
何承谋夏桀 ,终以灭丧 ?

帝乃降观 ,下逢伊摯。  
何条放致罚 ,而黎服大说 ?

简狄在台 ,啻何宜 ?  
玄鸟致贻 ,女何喜 ?

该秉季德 ,厥父是臧。  
胡终弊于有扈 ,牧夫牛羊 ?  
干协时舞 ,何以怀之 ?  
平胁曼肤 ,何以肥之 ?  
有扈牧竖 ,云何而逢 ?  
击床先出 ,其命何从 ?  
恒秉季德 ,焉得夫朴牛 ?  
何往营班祿 ,不但还来 ?  
昏微遵迹 ,有狄不宁。  
何繁鸟萃棘 ,负子肆情 ?  
眩弟并淫 ,危害厥兄。  
何变化以作诈 ,后嗣而逢长 ?

成汤东巡 ,有莘爰极 ;  
何乞彼小臣 ,而吉妃是得 ?  
水滨之木 ,得彼小子 ;  
夫何恶之 ,媵有莘之妇 ?  
汤出重泉 ,夫何罪尤 ?  
不胜心伐帝 ,夫谁使挑之 ?

会朝争盟 ,何践吾期 ?  
苍鸟群飞 ,孰使萃之 ?  
列击纣躬 ,叔旦不嘉。  
何亲揆发 ,足周之命以咨嗟 ?  
授殷天下 ,其位安施 ?  
反成乃亡 ,其罪伊何 ?  
急遣伐器 ,何以行之 ?  
并驱击翼 ,何以将之 ?

昭后成游 ,南土爰底。  
厥利惟何 ,逢彼白雉 ?

穆王巧梅 夫何为周流？  
环理天下 夫何索求？  
妖夫曳衒 何号于市？  
周幽谁诛 焉得夫褒姒？

天命反侧 何罚何佑？  
齐桓九会 卒然身杀？

彼王纣之躬 孰使乱惑？  
何恶辅弼 谗谄是服？  
比干何逆 而抑沈之？  
雷开阿顺 而赐封之？  
何圣人之一德 卒其异方？  
梅伯受醢 箕子详狂？

稷维元子 帝何竺之？  
投之于冰上 鸟何燠之？  
何冯弓挟矢 殊能将之？  
既惊帝切激 何逢长之？

伯昌号衰 秉鞭作牧。  
何令彻彼岐社 命有殷国？  
迁藏就岐 何能依？  
殷有惑妇 何所讥？  
受赐兹醢 西伯上告；  
何亲就上帝罚 殷之命以不救？  
师望在肆 昌何识？  
鼓刀扬声 后何喜？  
武发杀殷 何所悒？  
载尸集戣 何所急？

伯林雉经 维其何故？

何感天抑地 夫谁畏惧？

皇天集命 维何戒之？  
受礼天下 又使至代之？

初汤臣摯 后兹承辅；  
何卒官汤 尊食宗绪？

勋阖梦生 少离散亡；  
何壮武厉 能流厥严？

彭铿斟雉 帝何飧？  
受寿永多 夫何久长？

中央共牧 后何怒？  
蜂蛾微命 力何固？

惊女采薇 鹿何祐？  
北至回水 萃何喜？

兄有噬犬 弟何欲？  
易之以百两 卒无禄？  
薄暮雷电 归何忧？  
厥严不奉 帝何求？  
伏匿穴处 爰何云？  
荆勋作师 夫何长？  
悟过改更 我又何言？

吴光争国 久余是胜？  
何环穿自闾社丘陵 爰出子文？  
吾告堵敖以不长 何试上自予，  
忠名弥彰？

## 九 章

### 惜 诵

惜诵以致愍兮，发愤以抒情。  
所非忠而言之兮，指苍天以为正。  
令五帝以折中兮，戒六神与向服。  
俾山川以备御兮，命咎繇使听直。

竭忠诚而事君兮，反离群而赘疣。  
忘儂媚以背众兮，待明君其知之。  
言与行其可迹兮，情与貌其不变。  
故相臣莫若君兮，所以证之不远。  
吾谊先君而后身兮，羌众人之所仇也；  
专惟君而无他兮，又众兆之所讎也。  
壹心而不豫兮，羌不可保也；  
疾亲君而无他兮，有招祸之道也。

思君其莫我忠兮，忽忘身之贱贫。  
事君而不贰兮，迷不知宠之门。

忠何罪以遭罚兮，亦非余心之所志也。  
行不群以巖越兮，又众兆之所诃也。  
纷逢尤以离谤兮，謇不可释也。  
情沈抑而不达兮，又蔽而莫之白也。

心郁邑余侘傺兮，又莫察余之中情。  
固烦言不可结而诒兮，愿陈志而无路。  
退静默而莫余知兮，进号乎又莫吾闻。  
申侘傺之烦惑兮，中闷瞀之忡忡。

昔余梦登天兮，魂中道而无杭。  
吾使厉神占之兮，曰：“有志极而无旁。”

“终危独以离异兮？”曰：“君可思而不可

恃。

故众口其铄金兮，初若是而逢殆。  
愆于羹而吹兮，何不变此志也？  
欲释阶而登天兮，犹有曩之态也。  
众骇遽以离心兮，又何以为此伴也？  
同极而异路兮，又何以为此援也？  
晋申生之孝之兮，父信谗而不好。  
行婞直而不豫兮，鲧功用而不就。”

吾闻作忠以造怨兮，忽谓之过言。  
九折臂而成医兮，吾至今而知其信然。

矰弋机而在上兮，罟罗张而在下。  
设张辟以娱君兮，愿侧身而无所。

欲偃偃以干僚兮，恐重患而离尤；  
欲高飞而远集兮，君罔谓汝何之？  
欲横奔而失路兮，盖志坚而不忍。  
背膺牓以交痛兮，心郁结而纡轸。

搗木兰以矫蕙兮，申椒以为粮。  
播江离与滋菊兮，愿春日以为粮芳。  
恐情质之不信兮，故重著以自明。  
矫兹媚以私处兮，愿曾思而远身。

### 涉 江

余幼好此奇服兮，年既老而不衰。  
带长铗之陆离兮，冠切云之崔嵬。  
被明月兮珮宝璐。  
世溷浊而莫余知兮，吾方高驰而不顾。  
驾青虬兮骖白螭，吾与重华游兮瑶之圃。  
登昆仑兮食玉英，  
与天地兮比寿，与日月兮齐光。

哀南夷之莫吾知兮，旦余济乎江湘！

乘鄂渚而反顾兮，歛秋冬之绪风。  
步余马兮山皋，邸余车兮方林。

乘舸船余上沅兮，齐吴榜以击汰。  
船容与而不进兮，淹回水而疑滞。  
朝发枉渚兮，夕宿辰阳。  
苟余心之端直兮，虽僻远其何伤！

入溱浦余惆怅兮，迷不知吾所如。  
深林杳以冥冥兮，猿狖之所居。  
山峻高以蔽日兮，下幽晦以多雨。  
霰雪纷其无垠兮，云霏霏而承宇。

哀吾生之无乐兮，幽独处乎山中。  
吾不能变心而从俗兮，固将愁苦而终穷！

接舆髡首兮，桑扈羸行。  
忠不必用兮，贤不必以。  
伍子逢殃兮，比干菹醢。  
与前世而皆然兮，吾又何怨乎今之人！  
余将董道而不豫兮，固将重昏而终身！  
乱曰：  
鸾鸟凤皇，日以远兮。  
燕雀乌鹊，巢堂坛兮。  
露申辛夷，死林薄兮。  
腥臊并御，芳不得薄兮。  
阴阳易位，时不当兮。  
怀信侘傺，忽乎吾将行兮。

## 哀 郢

皇天之不纯命兮，何百姓之震愆。  
民离散而相失兮，方仲春而东迁。  
去故乡而就远兮，遵江夏以流亡。  
出国门而轸怀兮，甲之朝吾以行。

发郢都而去闾兮，怆荒忽兮焉极。  
楫齐扬以容与兮，哀见君而不再得。  
望长楸而太息兮，涕淫淫其若霰。  
过夏首而西浮兮，顾龙门而不见。  
心婵媛而伤怀兮，眇不知其所蹠。  
顺风波以从流兮，焉洋洋而为客。  
凌阳侯之泛滥兮，忽翱翔之焉薄？  
心结结而不解兮，思蹇产而不释。

将运舟而下浮兮，上洞庭而下江。  
去终古之所居兮，今逍遥而来东。

羌灵魂之欲归兮，何须臾而忘反。  
背夏浦而西思兮，哀故都之日远。  
登大坟以远望兮，聊以舒吾忧心。  
哀州土之平乐兮，悲江介之遗风。

当陵阳之焉至兮，淼南渡之焉如？  
曾不知夏之为丘兮，孰两东门之可芜！

心不怡之长久兮，忧与愁其相接。  
惟郢路之辽远兮，江与夏不可涉。  
忽若不信兮，至今九年而不复。  
惨郁郁而不通兮，蹇侘傺而含感。

外承欢之汨约兮，谗荏弱而难持。  
忠湛湛而愿进兮，妒被离而鄣之。  
尧舜之抗行兮，瞭杳杳而薄天。  
众谗人之嫉妒兮，被以不慈之伪名。

憎愠怆之修美兮，好夫人之忼慨。  
众踈蹠而日进兮，美超远而逾迈。

乱曰：  
曼余目以流观兮，冀一反之何时？  
鸟飞反故乡兮，狐死必首丘。  
信非吾罪而弃逐兮，何日夜而忘之？



## 抽 思

心郁郁之忧思兮，独永叹乎增伤。  
思蹇产之不释兮，曼遭夜之方长。  
悲秋风之动容兮，何回极之浮浮。  
数惟荪之多怒兮，伤余心之忧忧。  
愿摇起而横奔兮，览民尤以自镇。  
结微情以陈词兮，矫以遗夫美人。

昔君与我诚言兮，曰黄昏以为期。  
羌中道而回畔兮，反既有此他志。  
侨吾以其美好兮，览余以其修姱。  
与余言而不信兮，盖为余而造怒。

愿承间而自察兮，心震悼而不敢。  
悲夷犹而冀进兮，心怛伤之愴愴。  
兹历情以陈辞兮，荪详聋而不闻。  
固切人之不媚兮，众果以我为患。

初吾所陈之耿著兮，岂至今其庸亡。  
何独乐斯之謇謇兮，愿荪美之可光。  
望三五以为像兮，指彭咸以为仪。  
夫何极而不至兮，故远闻而难亏。  
善不由外来兮，名不可以虚作。  
孰无施而有报兮，孰不实而有获？

少歌曰：

与美人抽怨兮，并日夜而无正。  
侨吾以其美好兮，敖朕辞而不听。  
倡曰：

有鸟自南兮，来集汉北。  
好姱佳丽兮，胖独处此异域。  
既惇独而不群兮，又无良媒在其侧。  
道卓远而日忘兮，愿自申而不得。  
望北山而流涕兮，临流水而太息。

望孟夏之短夜兮，何晦明之若岁。

惟郢路之辽远兮，魂一夕而九逝。  
曾不知路之曲直兮，南指月与列星。  
愿径逝而未得兮，魂识路之营营。  
何灵魂之信直兮，人之心不与吾心同！  
理弱而媒不通兮，尚不知余之从容。

乱曰：

长濂湍流，沂江潭兮。  
狂顾南行，聊以娱心兮。  
轸石崑崙，蹇吾愿兮。  
超回志度，行隐进兮。  
低徊夷犹，宿北姑兮。  
烦冤瞫容，实沛祖兮。  
愁叹苦神，灵遥思兮。  
路远处幽，又无行媒兮。  
道思作颂，聊以自救兮。  
忧心不遂，斯言谁告兮！

## 怀 沙

滔滔孟夏兮，草木莽莽。  
伤怀永哀兮，汨徂南土。  
眴兮杳杳，孔静幽默。  
郁结纆轸兮，离愍而长鞠。  
抚情效志兮，冤屈而自抑。

刳方以为圜兮，常度未替。  
易初本迪兮，君子所鄙。  
章画志墨兮，前图未改。

内厚质正兮，大人所盛。  
巧倖不断兮，孰察其拨正？

玄文处幽兮，朦瞶谓之章。  
离娄微睇兮，瞽以为无明。  
变白以为黑兮，倒上以为下。  
凤皇在笱兮，鸡鹜翔舞。  
同糅玉石兮，一概而相量。  
夫惟党人之鄙固兮，羌不知余之所臧。

任重载盛兮，陷滞而不济。  
怀瑾握瑜兮，穷不知所示。  
邑犬之群吠兮，吠所怪也。  
非俊疑杰兮，固庸态也。  
文质疏内兮，从不知余之异采。  
材朴委积兮，莫知余之所有。

重仁袭义兮，谨厚以为丰。  
重华不可兮，孰知余之从容。  
古固有不并兮，岂知其何故也？  
汤禹久远兮，邈而不可慕也！

惩违改忿兮，抑心而自强。  
离愍而不迁兮，愿志之有像。

进路北次兮，日昧昧其将暮。  
舒忧娱哀兮，限之以大故。

乱曰：

浩浩沅湘，分流汨兮。  
修路幽蔽，道远忽兮。  
怀质抱情，独无匹兮。  
伯乐既没，骥焉程兮。  
民生稟命，各有所错兮。  
定心广志，余何所畏惧兮。  
曾伤爰哀，永叹喟兮。  
世溷浊莫吾知，人心不可谓兮。  
知死不可让，愿忽爰兮。  
明告君子，吾将以为类兮。

### 思美人

思美人兮，擘涕而竚眙。  
媒绝路阻兮，言不可结而诒。  
蹇蹇之烦冤兮，陷滞而不发。  
申旦以舒中情兮，志沈菀而莫达。

愿寄言于浮云兮，遇丰隆而不将。  
因归鸟而致辞兮，羌迅高而难当。  
高辛之灵盛兮，遭玄鸟而致诒。  
欲变节以从俗兮，媿易初而屈志。  
独历年而离愍兮，羌凭心犹未化。  
宁隐闵而寿考兮，何变易之可为！

知前辙之不遂兮，未改此度。  
车既覆而马颠兮，蹇独怀此异路。

勒骐驎而更驾兮，造父为我操之。  
迁逡次而勿驱兮，聊假日以须时。  
指嶠冢之西隈兮，与纁黄以为期。

开春发岁兮，白日出之悠悠。  
吾将荡志而愉乐兮，遵江夏以娱忧。

攀大薄之芳兮，搴长洲之宿莽。  
惜吾不及古人兮，吾谁与玩此芳草？  
解篇薄与杂菜兮，备以为交佩。  
佩缤纷以缭转兮，遂萎绝而离异。  
吾且儵徊以娱忧兮，观南人之变态。  
窃快在中心兮，扬厥凭而不谗。

芳与泽其杂糅兮，羌芳华自中出。  
纷郁郁其远蒸兮，满内而外扬。  
情与质信可保兮，羌居蔽而闻章。

令薜荔以为理兮，惮举趾而缘木。  
因芙蓉而为媒兮，惮攀裳而濡足。  
登高吾不说兮，入下吾不能。  
固朕形之下服兮，然容与而狐疑。

广遂前画兮，未改此度也。  
命则处幽吾将罢兮，愿及白日之未暮也。  
独茕茕而南行兮，思彭咸之故也。

## 惜往日

惜往日之曾信兮，受命诏以昭时。  
奉先功以照下兮，明法度之嫌疑。  
国富强而法立兮，属贞臣而日媿。  
秘密事之载心兮，虽过失犹弗治。

心纯靡而不泄兮，遭谗人而嫉之。  
君含怒而待臣兮，不清澈其然否。

蔽晦君之聪明兮，虚惑误又以欺。  
弗参验以考实兮，远迁臣而弗思。  
信谗谀之溷浊兮，盛气志而过之。

何贞臣之无罪兮，被离谤而见尤。  
惭光景之诚信兮，身幽隐而备之。  
临沅湘之玄渊兮，遂自忍而沈流。  
卒没身而绝名兮，惜壅君之不昭。

君无度而弗察兮，使芳草为薶幽。  
焉舒情而抽信兮，恬死亡而不聊。  
独障壅而蔽隐兮，使贞臣为无由。  
闻百里之为虏兮，伊尹烹于庖厨。  
吕望屠于朝歌兮，宁戚歌而饭牛。  
不逢汤武与桓缪兮，世孰云而知之。  
吴信谗而弗味兮，子胥死而后忧。  
介子忠而立枯兮，文君寤而追求。  
封介山而为之禁兮，报大德之优游。  
思久故之亲身兮，因缟素而哭之。

或忠信而死节兮，或弛慢而不疑。  
弗省察而按实兮，听谗人之虚辞。  
芳与泽其杂糅兮，孰申旦而别之。

何芳草之早凋兮，微霜降而下戒。  
谅聪不明而蔽壅兮，使谗谀而日得！

自前世之嫉贤兮，谓蕙若其不可佩。  
妒佳冶之芬芳兮，媿母姣而自好。  
虽有西施之美容兮，谗妒入以自代。

愿陈情以白行兮，得罪过之不意。  
情冤见之日明兮，如列宿之错置。

乘骐驎而驰骋兮，无辔衔而自载。  
乘泛淝以下流兮，无舟楫而自备。  
背法度而心治兮，辟与此其无异。  
宁溘死以流亡兮，恐祸殃之有再。  
不毕辞而赴渊兮，惜壅君之不识！

## 橘 颂

后皇嘉树，橘徠服兮。  
受命不迁，生南国兮。

深固难徙，更壹志兮。  
绿叶素荣，纷其可喜兮。  
曾枝剡棘，圆果抟兮。  
青黄杂糅，文章烂兮。  
精色内白，类任道兮。  
纷缦宜修，姱而不丑兮。

嗟尔幼志，有以异兮。  
独立不迁，岂不可喜兮？  
深固难徙，廓其无求兮。  
苏世独立，横而不流兮。  
闭心自慎，终不失过兮。  
秉德无私，参天地兮。

愿岁并谢，与长友兮。  
淑离不淫，梗其有理兮。  
年岁虽少，可师长兮。  
行比伯夷，置以为像兮。

## 悲回风

悲回风之摇蕙兮，心冤结而内伤。  
物有微而陨性兮，声有隐而先倡。  
夫何彭咸之造思兮，暨志介而不忘。  
万变其情岂可盖兮，孰虚伪之可长！

鸟兽鸣以号群兮，草苴比而不芳。  
鱼菹鳞以自别兮，蛟龙隐其文章。  
故荼荠不同亩兮，兰茝幽而独芳。  
惟佳人之永都兮，更统世以自贖。  
眇远志之所及兮，怜浮云之相羊。  
介眇志之所惑兮，窃赋诗之所明。

惟佳人之独怀兮，折芳椒以自处。  
曾歔歔之嗟嗟兮，独隐伏而思虑。  
涕泣交而淒淒兮，思不眠以至曙。  
终长夜之曼曼兮，掩此哀而不去。  
寤从容以周流兮，聊逍遥以自恃。  
伤太息之愍怜兮，气於邑而不可止。

纠思心以为纆兮，编愁苦以为膺。  
折若木以蔽光兮，随飘风之所仍。  
存仿佛而不见兮，心踊跃其若汤。  
抚佩衽以案志兮，超惘惘而遂行。

岁忽忽其若颓兮，时亦冉冉其将至。  
蘋蘩槁而节离兮，芳已歇而不比。  
怜思心之不可惩兮，证此言之不可聊。  
宁溘死以流亡兮，不忍为此之常愁。  
孤子吟而投泪兮，放子出而不还。  
孰能思而不隐兮，昭彭咸之所闻。

登石峦以远望兮，路眇眇之默默。

入景响之无应兮，闻省想而不可得。

愁郁郁之无快兮，居戚戚而不可解。  
心鞮鞻而不开兮，气缭转而自缔。  
穆眇眇之无垠兮，莽芒芒之无仪。  
声有隐而相感兮，物有纯而不可为。  
邈漫漫之不可量兮，缥绵绵之不可纡。  
愁悄悄之常悲兮，翩冥冥之不可娱。

凌大波而流风兮，托彭咸之所居。  
上高岩之峭岸兮，处雌蜺之标颠。  
据青冥而攄虹兮，遂倏忽而扞天。  
吸湛露之浮凉兮，漱凝霜之雰雰。  
依风穴以自息兮，忽倾寤以婵媛。

冯昆仑以瞰雾兮，隐岐山以清江。  
悼涌湍之湍兮，听波声之汹汹。

纷容容之无经兮，罔芒芒之无纪。  
轧洋洋之无从兮，驰委移之焉止。  
漂翻翻其上下兮，翼遥遥其左右。  
泛濛濛其前后兮，伴张驰之信期。

观炎气之相仍兮，窥烟液之所积。  
悲霜雪之俱下兮，听潮水之相击。  
借光景以往来兮，施黄棘之枉策。  
求介子之所存兮，见伯夷之放迹。  
心调度而弗去兮，刻著志之无适。

曰：  
吾怨往昔之所冀兮，悼来者之愁愁。  
浮江淮而入海兮，从子胥而自适。  
望大河之洲渚兮，悲申徒之抗迹。  
骤谏君而不听兮，重任石之何益。  
心结结而不解兮，思蹇产而不释。

## 远 游

悲时俗之迫阨兮，愿轻举而远游。  
质菲薄而无因兮，焉托乘而上浮。

遭沈浊而污秽兮，独郁结其谁语？  
夜耿耿而不寐兮，魂营营而至曙。

惟天地之无穷兮，哀人生之长勤。  
往者余弗及兮，来者吾不闻。

步徙倚而遥思兮，招惆怅而乘怀。  
意荒忽而流荡兮，心愁凄而增悲。

神倏忽而不反兮，形枯槁而独留。  
内惟省以端操兮，求正气之所由。

漠虚静以恬愉兮，澹无为而自得。  
闻赤松之清尘兮，愿承风乎遗则。

贵真人之休德兮，美往世之登仙。  
与化去而不见兮，名声著而日延。

奇传说之托辰星兮，羨韩众之得一。  
形穆穆以浸远兮，离人群而遁逸。

因气变而遂曾举兮，忽神奔而鬼怪。  
时仿佛以遥见兮，精皎皎以往来。

绝氛埃而淑邮兮，终不反其故都。  
免众患而不惧兮，世莫知其所如。

恐天时之代序兮，耀灵晔而西征。  
微霜降而下沦兮，悼芳草之先零。  
聊仿佯而逍遥兮，永历年而无成。  
谁可与玩斯遗芳兮，长向风而舒情。

高阳邈以远兮，余将焉所程？

重曰：

春秋忽其不淹兮，奚久留此故居？  
轩辕不可攀援兮，吾将从王乔而娱戏。

餐六气而饮沆瀣兮，漱正阳而含朝霞。  
保神明之清澄兮，精气入而粗秽除。

顺凯风以从游兮，至南巢而一息。  
见王子而宿之兮，审一气之和德。

曰：“道可受兮，不可传；  
其小无内兮，其大无垠；  
毋滑而魂兮，彼将自然；  
一气孔神兮，于中夜存；  
虚以待之兮，无为之先；  
庶类以成兮，此德之门。”

闻至贵而遂徂兮，忽乎吾将行。  
仍羽人于丹丘兮，留不死之旧乡。

朝濯发于汤谷兮，夕晞余身兮九阳。  
吸飞泉之微液兮，怀琬琰之华英。

玉色颀以晚颜兮，精醇粹而始壮。  
质销铄以约约兮，神要眇以淫放。  
嘉南州之炎德兮，丽桂树之冬荣。  
山萧条而无兽兮，野寂漠而无人。  
载营魄而登霞兮，掩浮云而上征。

命天阍其开关兮，排阊阖而望予。  
召丰隆使先导兮，问太微之所居。

集重阳入帝宫兮，造旬始而观清都。  
照发轫于太仪兮，夕始临乎于微闾。

屯余车之万乘兮，纷容与而并驰。  
驾八龙之婉婉兮，载云旗之逶迤。

建雄虹之采旄兮，五色杂而炫耀。  
服偃蹇以低昂兮，彳连蜷以骄骜。

骑胶葛以杂乱兮，斑漫衍而方行。  
撰余辔而正策兮，吾将过乎句芒。

历太皓以右转兮，前飞廉以启路。  
阳杲杲其未光兮，凌天地以径度。

风伯为余先驱兮，氛埃辟而清凉。  
凤皇翼其承旗兮，遇蓐收乎西皇。

揽彗星以为旂兮，举斗柄以为麾。  
叛陆离其上下兮，游惊雾之流波。

时暧暧其暋莽兮，召玄武而奔属。  
后文昌使掌行兮，选署众神以并轂。

路漫漫其修远兮，徐弭节而高厉。  
左雨师使径待兮，右雷公以为卫。

欲度世以忘归兮，意姿睢以担乔。  
内欣欣而自美兮，聊愉娱以淫乐。

涉青云以泛滥游兮，忽临睨夫旧乡。  
仆夫怀余心悲兮，边马顾而不行。

思旧故以想像兮，长太息而掩涕。  
泛容与而遐举兮，聊抑志而自弭。

指炎神而直驰兮，吾将往乎南疑。  
览方外之荒忽兮，沛罔象而自浮。

祝融戒而蹕御兮，腾告鸾鸟迎宓妃。  
张咸池奏承云兮，二女御九韶歌。  
使湘灵鼓瑟兮，令海若舞冯夷。  
玄螭虫象并出进兮，形繆虬而透蛇。

雌蜺便娟以增挠兮，鸾鸟轩翥而翔飞。  
音乐博衍无终极兮，焉乃逝以徘徊。

舒并节以驰骛兮，遶绝垠乎寒门。  
轶迅风于清源兮，从颢顼乎增冰。

历玄冥以邪径兮，乘间维以反顾。  
召黔羸而见之兮，为余先乎平路。

经营四方兮，周流六漠。  
上至列缺兮，降望大壑。

下峥嵘而无地兮，上寥廓而无天。  
视倏忽而无见兮，听惝怳而无闻。  
超无为以至清兮，与泰初而为邻。

## 卜 居

屈原既放，三年不得复见。  
竭知尽忠，而蔽障于谗。  
心烦虑乱，不知所从。  
乃往见太卜郑詹尹，

曰：“余有所疑，愿先生决之。”  
詹尹乃端策拂龟，  
曰：“君将何以教之？”

屈原曰：

“吾宁悃悃欷欷朴以忠乎？将送往劳来斯无穷乎？”

宁诛锄草茅以力耕乎？将游大人以成名乎？”

宁正言不讳以危身乎？将从俗富贵以偷生乎？”

宁超然高举以保真乎？

将咤訾栗斯，喔咿儒儿以事妇人乎？

宁廉洁正直以自清乎？将突梯滑稽，如脂如韦，

以絜楹乎？”

宁昂昂若千里之驹乎？将汜汜若水中之鳧，与波上下，偷以全吾躯乎？”

宁与骐驎亢轭乎？将随騊马之迹乎？  
宁与黄鹄比翼乎？将与鸡鹜争食乎？  
此孰吉孰凶？何去何从？

世溷浊而不清：

蝉翼为重，千钧为轻，

黄钟毁弃，瓦釜雷鸣，

谗人高张，贤士无名。

吁嗟默默兮，谁知吾之廉贞？”

詹尹乃释策而谢，曰：

“夫尺有所短，寸有所长，  
物有所不足，智有所不明，  
数有所不逮，神有所不通。

用君之心，行君之意，  
龟策诚不能知此事。”

## 渔 父

屈原既放，  
游于江潭，行吟泽畔，  
颜色憔悴，形容枯槁。

渔父见而问之曰：

“子非三闾大夫欤？何故至于斯？”

屈原曰：

“举世皆浊我独清，众人皆醉我独醒，是以见放。”

渔父曰：

“圣人不凝滞于物，而能与世推移。

世人皆浊，何不泥其泥而扬其波？

众人皆醉，何不铺其糟而歠其醪？

何故深思高举，自令放为？”

屈原曰：

“吾闻之：

新沐者必弹冠，新浴者必振衣。

安能以身之察察，受物之汶汶乎？”

宁赴湘流，葬于江鱼之腹中。

安能以皓皓之白，而蒙世俗之尘埃乎？”

渔父莞尔而笑，鼓枻而去。

乃歌曰：

“沧浪之水清兮，可以濯吾缨；

沧浪之水浊兮，可以濯吾足。”

遂去，不复与言。

## 九 辩

悲哉秋之为气也！萧瑟兮草木摇而变 衰。



慄慄兮若在远行 ,登山临水兮送将归。

沆寥兮天高而气清 ;寂嶮兮收潦而水清 ;

慄凄增欷兮薄寒之中人。

怆怳怳兮去故而就新 ;坎廪兮贫士失职而志不平。

廓落兮羁旅而无友生 ,惆怅兮而私自怜。

燕翩翩其辞归兮 ,蝉寂漠而无声。

雁雍雍而南游兮 ,鸱鸡啁晰而悲鸣。

独申旦而不寐兮 ,哀蟋蟀之宵征。

时亶亶而过中兮 ,蹇淹留而无成。

悲忧穷蹙兮独处廓 ,有美一人兮心不绎。

去乡离家兮徠远客 ,超逍遥兮今焉薄 ?

专思君兮不可化 ,君不知兮可奈何 !

蓄怨兮积思 ,心烦愴兮忘食事。

愿一见兮道余意 ,君之心兮与余异。

车既驾兮揭而归 ,不得见兮心伤悲。

倚结鞞兮长太息 ,涕潺湲兮下霑轼。

忼慨绝兮不得 ,中瞽乱兮迷惑。

私自怜兮何极 ,心怊怆兮谅直。

皇天平分四时兮 ,窃独悲此凛秋。

白露既下百草兮 ,奄离披此梧楸。

去白日之昭昭兮 ,袭长夜之悠悠。

离芳蔼之方壮兮 ,余萎约而悲愁。

秋既先戒以白露兮 ,冬又申之以严霜。

收恢台之孟夏兮 ,然欲僚而沈藏。

叶菸邑而无色兮 ,枝繁挈而交横。

颜淫溢而将罢兮 ,柯仿佛而萎黄。

蓊樛樛之可哀兮 ,形销铄而瘀伤。

惟其纷糅而将落兮 ,恨其失时而无当。

揽骝辔而下节兮 ,聊逍遥以相羊。

岁忽忽而遒尽兮 ,恐余寿之弗将。

悼余生之不时兮 ,逢此世之倥偬。

澹容与而独倚兮 ,蟋蟀鸣此西堂。

心怵惕而震荡兮 ,何所忧之多方 !

仰明月而太息兮 ,步列星而极明。

窃悲夫蕙华之曾敷兮 ,纷旖旎乎都房。

何曾华之无实兮 ,从风雨而飞飏 ?

以为君独服此蕙兮 ,羌无以异于众芳。

闵奇思之不通兮 ,将去君而高翔。

心闵怜之惨凄兮 ,愿一见而有明。

重无怨而生离兮 ,中肠辍而增伤。

岂不郁陶而思君兮 ,君之门以九重。

猛犬狺狺而迎吠兮 ,关梁闭而不通。

皇天淫溢而秋霖兮 ,后土何时而得漑 !

块独守此地泽兮 ,仰浮云而永叹。

何时俗之工巧兮 ,背绳墨而改错 !

却骐驎而不乘兮 ,策驽骀而取路。

当世岂无骐驎兮 ,诚莫之能善御。

见执轡者非其人兮 ,故弭辔而远去。

鳧雁皆唼夫梁藻兮 ,凤愈飘翔而高举。

圆凿而方枘兮 ,吾固知其铍铍而难入。

众鸟皆有所登栖兮 ,凤独遑遑而无所集。

愿衔枚而无言兮 ,尝被君之渥洽。

太公九十乃显荣兮 ,诚未遇其匹合。

谓骐驎兮安归 ?谓凤凰兮安栖 ?

变古易俗兮世衰 ,今之相者兮举肥。

骐驎伏匿而不见兮 ,凤凰高飞而不下。

鸟兽犹知怀德兮 ,何云贤士之不处 ?

骥不骤进而求服兮 ,凤亦不贪喂而忘食。

君弃远而不察兮 ,虽愿忠其焉得 ?



欲寂漠而绝端兮，窃不敢忘初之厚德。  
独悲愁其伤人兮，冯郁郁其何极！  
霜露惨凄而交下兮，心尚幸其弗济。  
霰雪雰糅其增加兮，乃知遭命之将至。  
愿徼幸而有待兮，泊莽莽与野草同死。  
愿自直而径往兮，路壅绝而不通。  
欲循道而平驱兮，又未知其所从。  
然中路而迷惑兮，自压按而学诵。  
性愚陋以褊浅兮，信未达乎从容。  
窃美申包胥之气盛兮，恐时世之不固。

何时俗之工巧兮，灭规矩而改凿。  
独耿介而不随兮，愿慕先圣之遗教。  
处浊世而显荣兮，非余心之所乐。  
与其无义而有名兮，宁处穷而守高。

食不偷而为饱兮，衣不苟而为温。  
窃慕诗人之遗风兮，愿托志乎素餐。  
蹇充倔而无端兮，泊莽莽而无垠。  
无衣裘以御冬兮，恐溘死不得见乎阳春。

靓杪秋之遥夜兮，心繚悷而有哀。  
春秋逶迤而日高兮，然惆怅而自悲。  
四时递来而卒岁兮，阴阳不可与偕。

白日晼晚其将入兮，明月销铄而减毁。  
岁忽忽而遒尽兮，老冉冉而愈弛。  
心摇阅而日幸兮，然怊怅而无冀。  
中憺恻之凄怆兮，长太息而增欷。

年洋洋以日往兮，老嶮廓而无处。  
事亶亶而觊进兮，蹇淹留而踳蹳。

何泛滥之浮云兮，森壅蔽此明月。  
忠昭昭而愿见兮，然露晞而莫达。  
愿皓日之显行兮，云濛濛而蔽之。  
窃不自料而愿忠兮，或黜点而污之。

尧舜之抗行兮，瞭冥冥而薄天。  
何险 之嫉妒兮，被以不慈之伪名？  
彼日月之照明兮，尚黯黩而有瑕。  
何况一国之事兮，亦多端而胶加。

被荷裋之晏晏兮，然潢洋而不可带。  
既骄美而伐武兮，负左右之耿介。  
憎愠怵之修美兮，好夫人之慷慨。  
众踳蹳而日进兮，美超远而逾迈。  
农夫辍耕而容与兮，恐田野之芜秽。  
事绵绵而多私兮，窃悼后之危败。  
世雷同而炫曜兮，何毁誉之昧昧！

今修饰而窥镜兮，后尚可以窜藏。  
愿寄言夫流星兮，羌倏忽而难当。  
卒壅蔽此浮云兮，下暗漠而无光。

尧舜皆有所举任兮，故高枕而自适。  
谅无怨于天下兮，心焉取此怵悷？  
乘骐驎之浏浏兮，驭安用夫强策？  
谅城郭之不足恃兮，虽重介之何益。  
遭翼翼而无终兮，媿愴愴而愁约。  
生天地之若过兮，功不成而无效。  
愿沈带而不见兮，尚欲布名乎天下。  
然潢洋而不遇兮，直恂 而自苦。

莽洋洋而无极兮，忽翱翔之焉薄？  
国有骥而不知乘兮，焉皇皇而更索？  
宁戚讴于车下兮，桓公闻而知之。  
无伯乐之善相兮，今谁使乎誉之。  
罔流涕以聊虑兮，惟著意而得之。  
纷饨饨之愿忠兮，妒被离而障之。

愿赐不肖之躯而别离兮，放游志乎云中。  
乘精气之抟抟兮，骛诸神之湛湛。  
骖白霓之习习兮，历群灵之丰丰。  
左朱雀之茷茷兮，右苍龙之躡躡。  
属雷师之阗阗兮，通飞廉之衙衙。

前轻辇之锵锵兮，后辘乘之从从。  
载云旗之委蛇兮，扈屯骑之容容。

计专专之不可化兮，愿遂推而为臧。  
赖皇天之厚德兮，还及君之无恙。

## 招 魂

朕幼清以廉洁兮，身服义而未沫。  
主此盛德兮，牵于俗而芜秽。  
上无所考此盛德兮，长离殃而愁苦。

帝告巫阳曰：  
“有人在下，我欲辅之。  
魂魄离散，汝筮予之。”

巫阳对曰：  
“掌梦！上帝命其难从！  
若必筮予之，  
恐后之谢，不能复用。”

巫阳焉乃下招曰：  
魂兮归来！  
去君之恒干，何为四方些？  
舍君之乐处，而离彼不祥些！

魂兮而来！东方不可以托些！  
长人千仞，惟魂是索些。  
十日代出，流金铄石些；  
彼皆习之，魂往必释些。  
归来归来！不可以托些！

魂兮归来！南方不可以止些！  
雕题黑齿，得人肉以祀，  
以其骨为醢些。  
蝮蛇蓊蓊，封狐千里些。  
雄虺九首，往来倏忽，  
吞人以益其心些。  
归来归来！不可以久淫些！

魂兮归来！  
西方之害，流沙千里些。  
旋入雷渊，靡散而不可止些。  
幸而得脱，其外旷宇些。  
赤蚁若象，玄蜂若壶些。  
五谷不生，丛菅是食些。  
其土烂人，求水无所得些。  
彷徨无所倚，广大无所极些。  
归来归来！恐自遗贼些。

魂兮归来！北方不可以止些！  
增冰峨峨，飞雪千里些。  
归来归来！不可以久坐！

魂兮归来！君无上天些！  
虎豹九关，啄害下人些。  
一夫九首，拔木九千些。  
豺狼从目，往来侏侏些。  
悬人以嬉，投之深渊些。  
致命于帝，然后得瞑些。  
归来归来！往恐危身些！

魂兮归来！君无下此幽都些！  
土伯九约，其角觺觺些。  
敦脓血拇，逐人哶哶些。  
参目虎首，其身若牛些。  
此皆甘人。  
归来归来！恐自遗灾些！  
魂兮归来！入修门些！  
工祝招君，背行先些。  
秦篝齐缕，郑绵络些。  
招具该备，永啸呼些。

魂兮归来！反故居些。

天地四方，多贼奸些。  
像设君室，静闲安些。

高堂邃宇，槛层轩些。  
层台累榭，临高山些。  
网户朱缀，刻方连些。  
冬有突厦，夏室寒些。  
川谷径复，流潺湲些。  
光风转蕙，汜崇兰些。

经堂入奥，朱尘筵些。  
砥室翠翘，挂曲琼些。  
翡翠珠被，烂齐光些。  
翡阿拂壁，罗帟张些。  
纂组绮縠，结琦璜些。

室中之观，多珍怪些。  
兰膏明烛，华容备些。  
二八侍宿，射递代些。  
九侯淑女，多迅众些。  
盛鬋不同制，实满宫些。  
容态好比，顺弥代些。  
弱颜固植，耆其有意些。  
姱容修态，绀洞房些。  
蛾眉曼睩，目腾光些。  
靡颜膩理，遗视矚些。  
离榭修幕，侍君之闲些。

翡帷翠帐，饰高堂些。  
红壁沙版，玄玉梁些。

仰观刻桷，画龙蛇些。  
坐堂伏槛，临曲池些。  
芙蓉始发，杂芰荷些。  
紫茎屏风，文缘波些。  
文异豹饰，侍陂 些。

轩轳既低，步骑罗些。  
兰薄户树，琼木篱些。  
魂兮归来！何远为些？

室家遂宗，食多方些。  
稻粱糈麦，挈黄粱些。  
大苦咸酸，辛甘行些。  
肥牛之臠，臠若芳些。  
和酸若苦，陈吴羹些。  
脯鳖炮羔，有柘浆些。  
鹄酸臠臠，煎鸿鹄些。  
露鸡臠蠃，厉而不爽些。  
粢糗蜜饵，有饗饷些。  
瑶浆蜜勺，实羽觞些。  
挫糟冻饮，耐清凉些。  
华酌既陈，有琼浆些。  
归反故室，敬而无妨些。

肴羞未通，女乐罗些。  
陈钟按鼓，造新歌些。  
涉江采菱，发扬荷些。  
美人既醉，朱颜酡些。  
娉光眇视，目曾波些。  
被文服纤，丽而不奇些。  
长发曼鬋，艳陆离些。  
二八齐容，起郑舞些。  
衿若交竿，抚案下些。  
竽瑟狂会，搥鸣鼓些。  
宫廷震惊，发激楚些。  
吴歃蔡讴，奏大吕些。  
士女杂坐，乱而不分些。  
放陈组纓，班其相纷些。  
郑卫妖玩，来杂陈些。  
激楚之结，独秀先些。  
菴蔽象棊，有六簿些。  
分曹并进，遒相迫些。  
成臯而牟，呼五白些。  
晋制犀比，费白日些。

铿钟摇簋 揆梓瑟些。  
娱酒不废 沈日夜些。  
兰膏明烛 华镫错些。  
结撰至思 兰芳假些。  
人有所极 同心赋些。  
耐饮尽欢 乐先故些。  
魂兮归来！反故居些！

乱曰：  
献岁发春兮汨吾南征，  
蓂蕢齐叶兮白芷生。

路贯庐江兮左长薄，  
倚沼畦瀛兮遥望博。  
青骊结驷兮齐千乘，  
悬火延起兮玄颜烝。  
步及骤处兮诱骋先，  
仰鹜若通兮引车右还。

与王趋梦兮课后先，  
君王亲发兮悼青兕。  
朱明承夜兮时不可以淹，  
皋兰被径兮斯路渐。

湛湛江水兮上有枫，  
目极千里兮伤春心。  
魂兮归来哀江南！

## 大 招

青春受谢 白日昭只。  
春气奋发 万物遽只。  
冥凌浹行 魂无逃只。  
魂魄归徕！无远遥只。  
魂乎归徕！无东无西、  
无南无北只。

东有大海 溺水漉漉只。  
螭龙并流 上下悠悠只。  
雾雨淫淫 白皓胶只。  
魂乎无东！汤谷寂寥只。

魂乎无南！南有炎火千里、  
蝮蛇蜒只。

山林险隘 虎豹蜿只。  
鰓鱓短狐 王虺鬻只。  
魂乎无南！蜮伤躬只。

魂乎无西！西方流沙、  
滂洋洋只。  
豕首纵目 被发鬣只。  
长爪踞牙 诶笑狂只。  
魂乎无西！多害伤只。

魂乎无北！北有寒山、  
连龙旄只。

代水不可涉 深不可测只。  
天白颢颢 寒凝凝只。  
魂乎无往！盈北极只。

魂魄归徕！闲以静只。  
自恣荆楚 安以定只。  
逞志究欲 心意安只。  
穷身永乐 年寿延只。  
魂乎归徕！乐不可言只。

五谷六仞 设菰粱只。  
鼎臠盈望 和致芳只。  
内鸽鸽鹄 味豺羹只。  
魂乎归徕！恣所尝只。

鲜蠪甘鸡 和楚酪只。  
醢豚苦狗 脍苴蓴只。  
吴酸蒿萎 不沾薄只。  
魂乎归徕！恣所择只。

炙鸱蒸鳧 滫鶩陈只。  
煎鱄臠雀 遽爽存只。  
魂乎归徕！丽以先只。

四酎并孰 ,不涩嗑只。  
清馨冻饮 ,不歎役只。  
吴醴白蘗 ,和楚沥只。  
魂乎归徕 ! 不遽惕只。

代秦郑卫 ,鸣竽张只。  
伏戏驾辩 ,楚芳商只。  
讴和扬阿 ,赵箫倡只。  
魂乎归徕 ! 定空桑只。

二八接舞 ,投诗赋只。  
叩钟调磬 ,娱人乱只。  
四上竞气 ,极声变只。  
魂乎归徕 ! 听歌谿只。

朱唇皓齿 ,嫔以媠只。  
比德好闲 ,习以都只。  
丰肉微骨 ,调以娱只。  
魂乎归徕 ! 安以舒只。

嫫目宜笑 ,娥眉曼只。  
容则秀雅 ,稚朱颜只。  
魂乎归徕 ! 静以安只。

嫫修滂浩 ,丽以佳只。  
曾颊倚耳 ,曲眉规只。  
滂心绰态 ,娇丽施只。  
小腰秀颈 ,若鲜卑只。  
魂乎归徕 ! 恩怨移只。

易中利心 ,以动作只。  
粉白黛黑 ,施芳泽只。  
长袂拂面 ,善留客只。  
魂乎归徕 ! 以娱昔只。  
青色直眉 ,美目嫫只。  
靨辅奇牙 ,宜笑嚙只。  
丰肉微骨 ,体便娟只。

魂乎归徕 ! 恣所便只。

夏屋广大 ,沙堂秀只。  
南房小坛 ,观绝霏只。  
曲屋步壙 ,宜扰畜只。  
腾驾步游 ,猎春囿只。  
琼毂错衡 ,英华假只。  
芭兰桂树 ,郁弥路只。  
魂乎归徕 ! 恣志虑只。

孔雀盈园 ,畜鸾皇只 !  
鵙鸿群晨 ,杂鹜鸽只。  
鸿鹄代游 ,曼鹔鹞只。  
魂乎归徕 ! 凤皇翔只。

曼泽怡面 ,血气盛只。  
永宜厥身 ,保寿命只。  
室家盈廷 ,爵禄盛只。  
魂乎归徕 ! 居室定只。

接径千里 ,出若云只。  
三圭重侯 ,听类神只。  
察笃天隐 ,孤寡存只。  
魂乎归徕 ! 正始昆只。

田邑千畝 ,人阜昌只。  
美冒众流 ,德泽章只。  
先威后文 ,善美明只。  
魂乎归徕 ! 赏罚当只。

名声若日 ,照四海只。  
德誉配天 ,万民理只。  
北至幽陵 ,南交阯只。  
西薄羊肠 ,东穷海只。  
魂乎归徕 ! 尚贤士只。

发政献行 ,禁苛暴只。  
举杰压陛 ,诛讥罢只。

直赢在位 近禹麾只。  
豪杰执政 流泽施只。  
魂乎归徕！国家为只。

雄雄赫赫 天德明只。

三公穆穆 登降堂只。  
诸侯毕极 立九卿只。  
昭质既设 大侯张只。  
执弓挟矢 揖辞让只。  
魂乎归徕！尚三王只。

## 惜 誓

惜余年老而日衰兮 岁忽忽而不反。  
登苍天而高举兮 历众山而日远。

观江河之纡曲兮 离四海之沾濡。  
攀北极而一息兮 吸沆瀣以充虚。

飞朱鸟使先驱兮 驾太一之象舆。  
苍龙蚬虬于左骖兮 白虎骋而为右骖。

建日月以为盖兮 载玉女于后车。  
驰骛于杳冥之中兮 休息虚昆仑之墟。

乐穷极而不厌兮 愿从容乎神明。  
涉丹水而驰骋兮 右大夏之遗风。

黄鹄之一举兮 知山川之纡曲。  
再举兮 睹天地之圆方。

临中国之众人兮 托回飙乎尚羊。

乃至少原之野兮 赤松王乔皆在旁。  
二子拥瑟而调均兮 余因称乎清商。

澹然而自乐兮 吸众气而翱翔。  
念我长生而久仙兮 不知反余之故乡。

黄鹄后时而寄处兮 鸱枭群而制之。  
神龙失水而陆居兮 为蝼蚁之所裁。  
夫黄鹄神龙犹如此兮 况贤者之逢乱世

哉！

寿冉冉而日衰兮 固傴回而不息。  
俗流从而不止兮 众枉聚而矫直。

或偷合而苟进兮 或隐居而深藏。  
苦称量之不审兮 同权概而就衡。

或推移而苟容兮 或直言之谓谗。  
伤诚是之不察兮 并纫茅丝以为索。

方世俗之幽昏兮 眩白黑之美恶。  
放山渊之龟玉兮 相与贵乎砾石。

梅伯数谏而致醢兮 来革顺志而用国。  
悲仁人之尽节兮 反为小人之所贼。

比干忠谏而剖心兮 箕子被发而佯狂。  
水背流而源竭兮 木去根而不长。  
非重躯以虑难兮 惜伤身之无功。

已矣哉！

独不见夫鸾凤之高翔兮 乃集大皇之野。  
循四极而回周兮 见盛德而后下。

彼圣人之神德兮 远浊世而自藏。  
使麒麟可得羁而系兮 又何以异乎犬羊！

## 招 隐 士

桂树丛生兮山之幽，偃蹇连蜷兮枝相缭。  
山气岷岷兮石嵯峨，溪谷崭岩兮水曾波。

猿狖群啸兮虎豹嗥，攀援桂枝兮聊淹留。

王孙游兮不归，春草生兮萋萋。

岁暮兮不自聊，蟋蟀鸣兮啾啾。

块兮轧，山曲崿，心淹留兮恫慌忽。

罔兮沕，燎兮栗，虎豹穴，丛薄深林兮人上栗。

嵌岑碣磳兮硿礚确确，树轮相纠兮林木茂勛。

青莎杂树兮靄草蘋靡，白鹿麕麇兮或腾或倚。

状貌嶙嶙兮峨峨，凄凄兮漼漼。

猕猴兮熊羆，慕类兮以悲。

攀援桂枝兮聊淹留，虎豹斗兮熊羆咆。

禽兽骇兮亡其曹。

王孙兮归来，山中兮不可以久留！

## 七 谏

### 初 放

平生于国兮，长于原野。  
言语讷澀兮，又无强辅。

浅智褊能兮，闻见又寡。  
数言便事兮，见怨门下。

王不察其长利兮，卒见弃乎原野。  
伏念思过兮，无可改者。

群众成朋兮，上浸以惑。  
巧佞在前兮，贤者灭息。  
尧舜圣已没兮，孰为忠直？

高山崔巍兮，水流汤汤。  
死日将至兮，与麋鹿同坑。

块兮鞠，当道宿。  
举世皆然兮，余将谁告？

斥逐鸿鹄兮，近习鸱枭。  
斩伐橘柚兮，列树苦桃。

便娟之修竹兮，寄生乎江潭。  
上葳蕤而防露兮，下泠泠而来风。

孰知其不合兮，若竹柏之异心。  
往者不可及兮，来者不可待。

悠悠苍天兮，莫我振理。  
窃怨君之不寤兮，吾独死而后已。

### 沈 江

惟往古之得失，览私微之所伤。

尧舜圣而慈仁兮，后世称而弗忘。

齐桓失于专任兮，夷吾忠而名彰。  
晋献惑于嬖姬兮，申生孝而被殃。

偃王行其仁义兮，荆文寤而徐亡。  
纣暴虐以失位兮，周得佐乎吕望。

修往古以行恩兮，封比干之丘垄。  
贤俊慕而自附兮，日浸淫而合同。

明法令而修理兮，兰芷幽而有芳。  
苦众人之妒予兮，箕子寤而佯狂。

不顾地以贪名兮，心怫郁而内伤。  
联蕙芷以为佩兮，过鲍肆而失香。

正臣端其操行兮，反离谤而见攘。  
世俗更而变化兮，伯夷饿于首阳。  
独廉洁而不容兮，叔齐久而逾明。

浮云陈而蔽晦兮，使日月乎无光。  
忠臣贞而欲谏兮，谗谀毁而在旁。  
秋草荣其将实兮，微霜下而夜降。  
商风肃而害生兮，百草育而不长。

众并谐以妒贤兮，孤圣特而易伤。  
怀计谋而不见用兮，岩穴处而隱藏。

成功隳而不卒兮，子胥死而不葬。  
世从俗而变化兮，随风靡而成行。  
信直退而毁败兮，虚伪进而得当。

追悔过之无极兮，岂尽忠而有功。  
废制度而不用兮，务行私而去公。

终不变而死节兮，惜年齿之未央。  
将方舟而下流兮，冀幸君之发蒙。

痛忠言之逆耳兮，恨申子之沈江。

愿悉心之所闻兮，遭值君之不聪。  
不开寤而难道兮，不别横之与纵。

听奸臣之浮说兮，绝国家之久长。  
灭规矩而不用兮，背绳墨之正方。

离忧患而乃寤兮，若纵火于秋蓬。  
业失之而不救兮，尚何论乎祸凶？  
彼离畔而朋党兮，独行之士其何望！

日渐染而不自知兮，秋毫微哉而变容。  
众轻积而折轴兮，原咎杂而累重。

赴湘沅之流澌兮，恐逐波而复东。  
怀沙砾而自沈兮，不忍见君之蔽壅。

## 怨世

世沈淖而难论兮，俗岭峨而嵒嵒。  
清泠泠而歼灭兮，混湛湛而日多。

皋鸲既以成群兮，玄鹤弭翼而屏移。  
蓬艾亲入御于床第兮，马兰踈蹕而日加。

弃捐药芷与杜衡兮，余奈世之不知芳何？  
何周道之平易兮，然芜秽而险戏。

高阳无故而委尘兮，唐虞点灼而毁议。  
谁使正其真是兮，虽有八师而不可为。

皇天保其真兮，后土持其久。  
服清白以逍遥兮，偏与乎玄英异色。

西施媢媢而不得见兮，嫫母勃屑而日待。  
桂蠹不知所淹留兮，蓼虫不知徙乎葵菜。  
处溷溷之浊世兮，今安所达乎吾志。



意有所载而远逝兮，固非众人之所识。

骥蹄踏于弊鞅兮，遇孙阳而得代。  
吕望穷困而不聊生兮，遭周文而舒志。

宁戚饭牛而商歌兮，桓公闻而弗置。  
路室女之方桑兮，孔子过之以自侍。

吾独乖刺而无当兮，心悼怵而耄思。  
思比干之悝悝兮，哀子胥之慎事。

悲楚人之和氏兮，献宝玉以为石。  
遇厉武之不察兮，羌两足以毕斲。

小人之居势兮，视忠正之何若？  
改前圣之法度兮，喜嗷嗷而妄作。

亲谗谀而疏贤圣兮，讼谓閻媿为丑恶。  
愉近习而蔽远兮，孰知察其黑白。

卒不得效其心容兮，安眇眇而无所归薄。  
专精爽以自明兮，晦冥冥而壅蔽。

年既已过太半兮，然埒轲而留滞。  
欲高飞而远集兮，恐离罔而灭败。

独冤抑而无极兮，伤精神而寿夭。  
皇天既不纯命兮，余生终无所依。

愿自沈于江流兮，绝横流而径逝。  
宁为江海之泥涂兮，安能久见此浊世！

## 怨 思

贤士穷而隐处兮，廉方正而不容。  
子胥谏而靡躯兮，比干忠而剖心。  
子推自割而饲君兮，德日忘而怨深。  
行明白而曰黑兮，荆棘聚而成林。

江离弃于穷巷兮，蒺藜蔓乎东厢。  
贤者蔽而不见兮，谗谀进而相朋。  
皋鹄并进而俱鸣兮，凤皇飞而高翔。  
愿一往而径逝兮，道壅绝而不通。

## 自 悲

居愁勤其谁告兮，独永思而忧悲。  
内自省而不惭兮，操愈坚而不衰。

隐三年而无决兮，岁忽忽其若颓。  
怜余身不足以卒意兮，冀一见而复归。  
哀人事之不幸兮，属天命而委之咸池。  
身悲疾而不间兮，心沸热其若汤。

冰炭不可以相并兮，吾固知乎命之不长。  
哀独苦死之无乐兮，惜予年之未央。  
悲不反余之所居兮，恨离余之故乡。

鸟兽惊而失群兮，犹高飞而哀鸣。  
狐死必首丘兮，夫人孰能不反其真情。

故人疏而日忘兮，新人近而俞好。  
莫能行于杳冥兮，孰能施于无报。

苦众人之皆然兮，乘回风而远游。  
凌恒山其若陋兮，聊愉娱以忘忧。

悲虚言之无实兮，苦众口之铄金。  
过故乡而一顾兮，泣歔歔而沾衿。

厌白玉以为面兮，怀琬琰以为心。  
邪气入而感内兮，施玉色而外淫。

何青云之流澜兮，微霜降之蒙蒙。  
徐风至而徘徊兮，疾风过之汤汤。

闻南藩乐而欲往兮，至会稽而且止。

见韩众而宿之兮，问天道之所在。

借浮云以送予兮，载雌霓而为旌。  
驾青龙以驰骛兮，班衍衍之冥冥。

忽容容其安之兮，超慌忽其焉如。  
苦众人之难信兮，愿离群而远举。

登峦山而远望兮，好桂树之冬荣。  
观天火之炎炆兮，听大壑之波声。  
引八维以自道兮，含沆瀣以长生。

居不乐以时思兮，食草木之秋实。  
饮菌若之朝露兮，构桂木而为室。

杂橘柚以为囿兮，列新夷与椒楨。  
鸱鹤孤而夜号兮，哀居者之诚贞。

## 哀 命

哀时命之不合兮，伤楚国之多忧。  
内怀情之洁白兮，遭乱世而离尤。

恶耿介之直行兮，世混浊而不知。  
何君臣之相失兮，上沅湘而分离。

测汨罗之湘水兮，知时固而不反。  
伤离散之交战兮，遂侧身而既远。

处玄舍之幽门兮，穴岩石而窟伏。  
从水蛟而为徒兮，与神龙乎休息。

何山石之崭岩兮，灵魂屈而偃蹇。  
含素水而蒙深兮，日眇眇而既远。

哀形体之离解兮，神罔两而无舍。  
惟椒兰之不反兮，魂迷惑而不知路。

愿无过之设行兮，虽灭没之自乐。  
痛楚国之流亡兮，哀灵修之过到。

固时俗之混浊兮，志瞽迷而不知路。  
念私门之正匠兮，遥涉江而远去。

念女嬃之婵媛兮，涕泣流乎于悒。  
我决死而不生兮，虽重追吾何及。

戏疾瀨之素水兮，望高山之蹇产。  
哀高丘之赤岸兮，遂没身而不反。

## 谬 谏

怨灵修之浩荡兮，夫何执操之不固。  
悲太山之为隍兮，孰江河之可涸！

愿承间而效志兮，恐犯忌而干讳。  
卒抚情以寂寞兮，然怊怅而自悲。

玉与石其同匱兮，贯鱼眼与珠玑。  
骛骏杂而不分兮，服罢牛而骖驎。

年滔滔而自远兮，寿冉冉而愈衰。  
心怵憚而烦冤兮，蹇超遥而无翼。

固时俗之工七兮，灭规矩而改错。  
却骐驎而不乘兮，策驽骀而取路。

当世岂无骐驎兮，诚无王良之善驭。  
见执轡者非其人兮，故驹跳而远去。

不量凿而正枘兮，恐矩矱之不同。  
不论世而高举兮，恐操行之不调。

弧弓弛而不张兮，孰云知其所至。  
无倾危之患难兮，焉知贤士之所死？

俗推佞而进富兮，节行张而不著。  
贤良蔽而不群兮，朋曹比而党誉。

邪说饰而多曲兮，正法弧而不公。  
直士隐而避匿兮，谗谀登乎明堂。

弃彭咸之娱乐兮，灭巧倖之绳墨。  
菑落杂于麀蒸兮，机蓬矢以射革。

驾蹇驴而无策兮，又何路之能极？  
以直针而为钓兮，又何鱼之能得？

伯牙之绝弦兮，无钟子期而听之。  
和抱璞而泣血兮，安得良工而剖之？

同音者相和兮，同类者相似。  
飞鸟号其群兮，鹿鸣求其友。

故叩宫而宫应兮，弹角而角动。  
虎啸而谷风至兮，龙举而景云往。  
音声之相和兮，言物类之相感也。

夫方圆之异形兮，势不可以相错。

列子隐身而穷处兮，世莫可以寄托。

众鸟皆有行列兮，凤独翱翔而无所薄。  
经浊世而不得志兮，愿侧身岩穴而自托。

欲阖口而无言兮，尝被君之厚德。  
独便愒而怀毒兮，愁郁郁之焉极。

念三年之积思兮，愿一见而陈词。  
不及君而骋说兮，世孰可为明之？

身寝疾而日愁兮，情沈抑而不扬。  
众人莫可与论道兮，悲精神之不通。

## 乱 曰

鸾鸟孔凤日以远兮，畜皂驾鹅。  
鸡鹜满堂坛兮，蛙黾游乎华池。  
要 奔亡兮，腾驾囊驼。  
铅刀进御兮，遥弃太阿。  
拔擢玄芝兮，列树芋荷。  
橘柚萎枯兮，苦李旖旎。  
翩跹登于明堂兮，周鼎潜乎深渊。  
自古而固然兮，吾又何怨乎今之人！

## 哀 时 命

哀时命之不及古人兮，夫何予生之不遭  
时！

往者不可扳援兮，来者不可与期。  
志憾恨而不逞兮，抒中情而属诗。  
夜炯炯而不寐兮，怀隐忧而历兹。  
心郁郁而无告兮，众孰可以深谋？  
欲愁悴而委情兮，老冉冉而逮之。

居处愁以隐约兮，志沈抑而不扬。  
道壅塞而不通兮，江河广而无梁。

愿至昆仑之悬圃兮，采钟山之玉英。  
揽瑶木之檀枝兮，望阊风之板桐。  
弱水汨其为难兮，路中断而不通。  
势不能凌波以径度兮，又无羽翼而高翔。  
然隐悯而不达兮，独徙倚而彷徨。  
怅惝罔以永思兮，心纤轸而增伤。  
倚踌躇以淹留兮，日饥谨而绝粮。  
廓抱景而独倚兮，超永思乎故乡。  
廓落寂而无友兮，谁可与玩此遗芳！  
白日晡晚其将入兮，哀余寿之弗将。

车即弊而马罢兮，蹇遑徊而不能行。  
身既不容于浊世兮，不知进退之宜当。  
冠崔巍而切云兮，剑淋漓而从横。  
衣摄叶以储与兮，左袪挂于樽桑。  
左衽拂于不周兮，六合不足以肆行。  
上同凿枘于伏戏兮，下合矩矱于虞唐。  
愿尊节而式高兮，志犹卑夫禹汤。  
虽知困其不改操兮，终不以邪枉害方。  
世并举而好朋兮，一斗斛而相量。  
众比周而肩迫兮，贤者远而隐藏。

为凤皇作鹑笼兮，虽翕翅其不容。  
灵皇其不寐知兮，焉陈词而效忠？  
俗嫉妒而蔽贤兮，孰知余之从容？  
愿舒志而抽冯兮，庸讵知其吉凶？  
璋珪杂于甑窰兮，陇廉与孟嫫同宫。  
举世以为恒俗兮，固将愁苦而终穷。  
幽独转而不寐兮，惟烦懣而盈胸。  
魂眇眇而驰骋兮，心烦冤之忡忡。

志欲憾而不愴兮，路幽昧而甚难。  
块独守此曲隅兮，然欲切而永叹。  
愁秋夜而宛转兮，气涓沸其若波。  
握剞劂而不用兮，操规矩而无所施。

骋骐驎于中庭兮，焉能极夫远道？  
置猿狖于櫺槛兮，夫何以责其捷巧？

跼跛鳖而上山兮，吾固知其不能升。  
释管晏而任臧获兮，何权衡之能称？

籝杂于麤蒸兮，机蓬矢以射革。  
负担荷以丈尺兮，欲伸腰而不可得。  
外迫胁于机臂兮，上牵联于矰弋。  
肩倾侧而不容兮，固狭腹而不得息。

务光自投于深渊兮，不获世之尘垢。  
孰魁摧之可久兮，愿退身而穷处，  
凿山楹而为室兮，下被衣于水渚。  
雾露濛濛其晨降兮，云依斐而承宇。  
虹霓纷其朝霞兮，夕淫淫而淋雨。  
怊茫茫而无归兮，怅远望此旷野。  
下垂钓于溪谷兮，上要求于仙者。  
与赤松而结友兮，比王乔而为耦。  
使臬杨先导兮，白虎为之前后。  
浮云雾而入冥兮，骑白鹿而容与。  
魂眈眈以寄独兮，汨徂往而不归。  
处卓卓而日远兮，志浩荡而伤怀。  
鸾凤翔于苍云兮，故矰缴而不能加。  
蛟龙潜于旋渊兮，身不挂于罔罗。  
知贪饵而近死兮，不如下游乎清波。  
宁幽隐以远祸兮，孰侵辱之可为！  
子胥死而成义兮，屈原沉于汨罗。  
虽体解其不变兮，岂忠信之可化？  
志怍怍而内直兮，履绳墨而不颇。  
执权衡而无私兮，称轻重而不差。

概尘垢之枉攘兮，除秽累而反真。  
形体白而质素兮，中皎洁而淑清。  
时厌饫而不用兮，且隐伏而远身。  
聊窜端而匿迹兮，嗅寂默而无声。  
独便娟而烦毒兮，焉发愤而抒情。  
时暧暧其将罢兮，遂闷叹而无名。  
伯夷死于首阳兮，卒天隐而不荣。  
太公不遇文王兮，身至死而不得逞。  
怀瑶象而佩琼兮，愿陈列而无正。  
生天地之若过兮，忽烂漫而无成。  
邪气袭余之形体兮，疾憺怛而萌生。  
愿一见阳春之白日兮，恐不终乎永年。

## 九 怀

阴忧兮感余，惆怅兮自怜。

### 匡 机

极运兮不中，来将屈兮困穷。  
余深愍兮惨怛，愿一列兮无从。  
乘日月兮上征，顾游心兮鄙丰。  
弥览兮九隅，彷徨兮兰宫。  
芷闾兮药房，奋摇兮众芳。  
菌阁兮蕙楼，观道兮从横。  
宝金兮委积，美玉兮盈堂。  
桂水兮潺湲，扬流兮洋洋。  
蓂蔡兮踊跃，孔鹤兮回翔。  
抚槛兮远望，念君兮不忘。  
怫郁兮莫陈，永怀兮内伤。

### 通 路

天门兮地户，孰由兮贤者？  
无正兮混厕，怀德兮何睹？  
假寐兮愍斯，谁可与兮寤语？  
痛凤兮远逝，畜鸩兮近处。  
鲸鱓兮幽潜，从虾兮游渚。  
乘虬兮登阳，载象兮上行。  
朝发兮葱岭，夕至兮明光。  
北饮兮飞泉，南采兮芝英。  
宣游兮列宿，顺极兮彷徨。  
红采兮骀衣，翠缥兮为裳。  
舒佩兮淋漓，竦余剑兮干将。  
腾蛇兮后从，飞駟兮步旁。  
微观兮玄圃，览察兮瑶光。  
启匮兮探策，悲命兮相当。  
纫蕙兮永辞，将离兮所思。  
浮云兮容与，道余兮何之？  
远望兮阡眠，闻雷兮阗阗。

### 危 俊

林不容兮鸣蜩，余何留兮中州？  
陶嘉月兮总驾，攀玉英兮自修。  
结荣萑兮透逝，将去烝兮远游。  
径岱土兮魏阙，历九曲兮牵牛。  
聊假日兮相伴，遗光耀兮周流。  
望太一兮淹息，紆余轡兮自休。  
晞白日兮皎皎，弥远路兮悠悠。  
顾列李兮缥缈，观幽云兮陈浮。  
钜宝迁兮砢礧，雉咸雌兮相求。  
决莽莽兮究志，惧吾心兮恟恟。  
步余马兮飞柱，览可与兮匹俦。  
卒莫有兮纤介，永余思兮怵怵。

### 昭 世

世混兮冥昏，违君兮归真。  
乘龙兮偃蹇，高回翔兮上臻。  
袭英衣兮缁，披华裳兮芳芬。  
登羊角兮扶輿，浮云漠兮自娱。  
握精神兮雍容，与神人兮相胥。  
流星坠兮成雨，进瞵盼兮上丘墟。  
览旧邦兮滃郁，余安能兮久居？  
志怀逝兮心恻慄，紆余轡兮踟躇。  
闻素女兮微歌，听王后兮吹竽。  
魂凄怆兮感哀，肠回回兮盘纡。  
抚余佩兮缤纷，高太息兮自怜。  
使祝融兮先行，令昭明兮开门。  
驰六蛟兮上征，竦余驾兮入冥。  
历九州兮索合，谁可与兮终生？  
忽反顾兮西园，睹轸丘兮崎倾。

横垂涕兮泓流，悲余后兮失灵。

### 尊 嘉

季春兮阳阳，列草兮成行。  
余悲兮兰生，委积兮从横。  
江离兮遗捐，辛夷兮挤臧。  
伊思兮往古，亦多兮遭殃。  
伍胥兮浮江，屈子兮沉湘。  
运余兮念兹，心内兮怀伤。  
望淮兮沛沛，滨流兮则逝。  
榜舫兮下流，东注兮 。  
蛟龙兮导引，文鱼兮上濂。  
抽蒲兮陈坐，援芙蓉兮为盖。  
水跃兮余旌，继以兮微蔡。  
云旗兮电骛，倏忽兮容裔。  
河伯兮开门，迎余兮欢欢。  
顾念兮旧都，怀恨兮艰难。  
窃哀兮浮萍，泛淫兮无垠。

### 蓄 英

秋风兮萧萧，舒芳兮振条。  
微霜兮眇眇，病殀兮鸣蜩。  
玄鸟兮辞归，飞翔兮灵丘。  
望溪兮滢郁，熊罴兮咆哮。  
唐虞兮不存，何故兮久留？  
临渊兮汪洋，顾林兮忽荒。  
修余兮袿衣，骑霓兮南上。  
乘云兮回回，麇麇兮自强。  
将息兮兰皋，矢志兮悠悠。  
蒔蘊兮霉黧，思君兮无聊。  
身去兮意存，怆恨兮怀愁。

### 思 忠

登九灵兮游神，静女歌兮微晨。  
悲皇丘兮积葛，众体错兮交纷。

贞枝抑兮枯槁，枉车登兮庆云。  
感余志兮惨栗，心怆怆兮自怜。  
驾玄螭兮北征，向吾路兮葱岭。  
连五宿兮建旄，扬氛气兮为旌。  
历广漠兮驰骛，览中国兮冥冥。  
玄武步兮水母，与吾期兮南荣。  
登华盖兮乘阳，聊逍遥兮播光。  
抽库娄兮酌醴，援爬瓜兮接粮。  
毕休息兮远逝，发玉轸兮西行。  
惟时俗兮疾正，弗可久兮此方。  
寤辟摽兮永思，心怫郁兮内伤。

### 陶 壅

览杳杳兮世惟，余惆怅兮何归？  
伤时俗兮混乱，将奋翼兮高飞。  
驾六龙兮连蜷，建虹旌兮威夷。  
观中宇兮浩浩，纷翼翼兮上跻。  
浮溺水兮舒光，淹低徊兮京汜。  
屯余车兮索友，睹皇公兮问师。  
道莫贵兮归真，羨余术兮可夷。  
吾乃逝兮南娵，道幽路兮九疑。  
越炎火兮万里，过万首兮嶷嶷。  
济江海兮蝉蜕，绝北梁兮永辞。  
浮云郁兮昼昏，霾土忽兮塵塵。  
息阳城兮广夏，衰色罔兮中怠。  
意晓阳兮燎寤，乃自诊兮在兹。  
思尧舜兮袭兴，幸咎繇兮获谋。  
悲九州兮靡君，抚轼叹兮作诗。

### 株 昭

悲哉于嗟兮，内心切磋！  
款冬而生兮，凋彼叶柯。  
瓦砾进宝兮，捐弃随和。  
铅刀厉御兮，颓弃太阿。  
骥垂两耳兮，中坂蹉跎。  
蹇驴服驾兮，无用日多。

修洁处幽兮 贵宠沙飏。  
凤皇不翔兮 鸛鷖飞扬。  
乘虹骖蜺兮 载云变化。  
鹤鹖开路兮 后属青蛇。  
步骤桂林兮 超骧卷阿。  
丘陵翔舞兮 溪谷悲歌。  
神章灵篇兮 赴曲相和。  
余私娱兹兮 孰哉复加？

还顾世俗兮 坏败罔罗。  
卷佩将逝兮 涕流滂沱。

## 乱 曰

皇门开兮照下土 株秽除兮兰芷睹。  
四佞放兮后得禹 圣舜摄兮昭尧绪，  
孰能若兮愿为辅。

## 九 叹

### 逢 纷

伊伯庸之末胄兮 凉皇直之屈原。  
云余肇祖于高阳兮 惟楚怀之婣连。  
原生受命于贞节兮 鸿永路有嘉名。  
齐名字于天地兮 并光明于列星。  
吸精粹而吐氛浊兮 横邪世而不取容。  
行叩诚而不阿兮 遂见排而逢逸。  
后听虚而黜实兮 不吾理而顺情。  
肠愤悁而含怒兮 志迁蹇而左倾。  
心怏慌其不我与兮 躬速速其不吾亲。  
辞灵修而陨志兮 吟泽畔之江滨。  
椒桂罗以颠覆兮 有竭信而归诚。  
逸夫蔼蔼而漫著兮 曷其不舒予情。

芙蓉盖而菱华车兮 紫贝阙而玉堂。  
薜荔饰而陆离荐兮 鱼鳞衣而白霓裳。  
登逢龙而下陨兮 违故都之漫漫。  
思南郢之旧俗兮 肠一夕而九运。  
扬流波之潢潢兮 体溶溶而东回。  
心怊怅以永思兮 意晻晻而日颓。  
白露纷以涂涂兮 秋风浏以萧萧。  
身永流而不还兮 魂长逝而常愁。

叹曰：

譬彼流水 纷扬兮，  
波逢汹涌 湓滂沛兮。  
揄扬涤荡 漂流陨往 触崖石兮。  
龙邛睍圈 缭戾宛转 阻相薄兮。  
遭纷逢凶 蹇离尤兮。  
垂文扬采 遗将来兮。

### 离 世

始结言于庙堂兮 信中涂而叛之。  
怀兰蕙与衡芷兮 行中野而散之。  
声哀哀而怀高丘兮 心愁愁而思旧邦。  
愿承间而自恃兮 径淫暄而道壅。  
颜霉黧以沮败兮 精越裂而衰毫。  
裳襜褕而含风兮 衣纳纳而掩露。  
赴湘江之湍流兮 顺波凑而下降。  
徐徘徊于山阿兮 飘风来之汹汹。  
驰余车兮玄石 步余马兮洞庭。  
平明发兮苍梧 夕投宿兮石城。

灵怀其不吾知兮 灵怀其不吾闻。  
就灵杯之皇祖兮 愬灵怀之鬼神。  
灵怀曾不吾与兮 即听夫人之谗辞。  
余辞上参于天地兮 旁引之于四时。  
指日月使延照兮 抚招摇以质正。  
立师旷俾端词兮 命咎繇使并听。  
兆出名曰正则兮 卦发字曰灵均。  
余幼既有此鸿节兮 长愈固而弥纯。



不从俗而谀行兮，直躬指而信志。  
不枉绳以追曲兮，屈情素以从事。  
端余行其如玉兮，述皇舆之踵迹。  
群阿容以晦光兮，皇舆覆以幽辟。  
舆中涂以回畔兮，駟马惊而横奔。  
执组者不能制兮，必折轭而摧辕。  
断镳衔以驰骛兮，暮去次而敢止。  
路荡荡其无人兮，遂不御乎千里。

身衡陷而下沈兮，不可获而复登。  
不顾身之卑贱兮，惜皇舆之不兴。  
出国门而端指兮，冀一寤而锡还。  
哀仆夫之坎毒兮，屡离忧而逢患。  
九年之中不吾反兮，思彭咸之水游。  
惜师延之浮渚兮，赴汨罗之长流。  
遵江曲之逶移兮，触石碣而衡游。  
波澧澧而扬澆兮，顺长濑之浊流。  
凌黄沱而下低兮，思还流而复反。  
玄舆驰而并集兮，身容与而日远。  
櫂舟杭以横沥兮，济湘流而南极。  
立江界而长吟兮，愁哀哀而累息。  
情慌忽以忘归兮，神浮游以高厉。  
心蛰蛰而怀顾兮，魂眷眷而独逝。

叹曰：

余思旧邦，心依违兮。  
日暮黄昏，羌幽悲兮。  
去郢东迁，余谁慕兮。  
逸夫党旅，其以兹故兮。  
河水淫淫，情所愿兮。  
顾瞻郢路，终不返兮。

## 怨 思

惟郁郁之忧毒兮，志坎壈而不违。  
身憔悴而考旦兮，日黄昏而长悲。  
闵空宇之孤子兮，哀枯杨之冤维。  
孤雌吟于高墉兮，鸣鸠栖于桑榆。

玄猿失于潜林兮，独偏弃而远放。  
征夫劳于周行兮，处妇愤而长望。  
申诚信而罔违兮，情素结于纽帛。  
光明齐于日月兮，文采耀于玉石。  
伤压次而不发兮，思沈抑而不扬。  
芳懿懿而终败兮，名靡散而不彰。

背玉门以奔骛兮，蹇离尤而干诟。  
若龙逢之沈首兮，王子比干之逢醢。  
念社稷之几危兮，反为讎而见怨。  
思国家之离沮兮，躬获愆而结难。  
若青蝇之伪质兮，晋骊姬之反情。  
恐登阶之逢殆兮，故退伏于未庭。  
孽臣之号咷兮，本朝芜而不治。  
犯颜色而触谏兮，反蒙辜而被疑。  
菀蘼芜与菌若兮，渐藁本于洿渌。  
淹芳芷于腐井兮，弃鸡骇于筐籝。  
执棠溪以荆蓬兮，秉干将以割肉兮。  
筐泽泻以豹鞬兮，破荆和以继筑。  
时混浊犹未清兮，世彘乱犹未察。  
欲容与以竣时兮，惧年岁之既晏。  
顾屈节以从流兮，心巩巩而不夷。  
宁浮沅而驰骋兮，下江湘而遭回。

叹曰：

山中樛樛，余伤怀兮，  
征夫皇皇，各孰依兮。  
经营原野，杳冥冥兮。  
乘骐骋骥，舒吾情兮。  
归骸旧邦，莫谁语兮。  
长辞远逝，乘湘去兮。

## 远 逝

志隐隐而郁怫兮，愁独哀而冤结。  
肠纷纭以缭转兮，涕渐渐其若屑。  
情慨慨而长怀兮，信上皇而质正。  
合五岳与八灵兮，讯九魁与六神。



## 惜 贤

指列宿以白情兮，诉五帝以置词。  
北斗为我折中兮，太一为余听之。  
云服阴阳之正道兮，御后土之中和。  
佩苍龙之蚺虬兮，带隐虹之透蛇。  
曳彗星之皓旰兮，抚朱爵与 蚁。  
游清灵之飒戾兮，服云衣之披披。  
杖玉华与朱旗兮，垂明月之玄珠。  
举霓旌之带鬃兮，建黄纁之总旒。

躬纯粹而罔愆兮，承皇考之妙仪。  
惜往事之不合兮，横汨罗而下流。  
乘隆波而南渡兮，逐江湘之顺流。  
赴阳侯之潢洋兮，下石濑而登洲。  
陵魁堆以蔽视兮，云冥冥而闾前。  
山峻高以无垠兮，遂曾闷而迫身。  
雪雰雰而薄木兮，云霏霏而隕集。  
阜隘狭而幽险兮，石嵒嵒以翳日。  
悲故乡而发忿兮，去余邦之弥久。  
背龙门而入河兮，登大坟而望夏首。  
横舟航而济湘兮，耳聊啾而悦慌。  
波淫淫而周流兮，鸿溶溢而滔荡。  
路曼曼其无端兮，周容容而无识。  
引日月以指极兮，少须臾而释思。  
水波远以冥冥兮，眇不睹其东西。  
顺风波以南北兮，雾宵晦以纷纷。  
日杳杳以西颓兮，路长远而窘迫。  
欲酌醴以娱忧兮，蹇骚骚而不释。

叹曰：

飘风蓬龙，埃埒埒兮。  
草木摇落，时槁悴兮。  
遭倾遇祸，不可救兮。  
长吟永歎，涕究究兮。  
舒情陈诗，冀以自免兮。  
颓流下隕，身日远兮。

览屈氏之离骚兮，心哀哀而怫郁。  
声嗷嗷以寂寥兮，顾仆夫之憔悴。  
拔谄谀而匡邪兮，切澳忍之流俗。  
荡澨淩之奸咎兮，夷蠢蠢之混浊。  
怀芬香而挾蕙兮，佩江离之萋萋。  
握申椒与杜若兮，冠浮云之峨峨。  
登长陵而四望兮，览芷圃之蠹蠹。  
游兰皋与蕙林兮，睨玉石之岵嵒。  
扬精华以眩耀兮，芳郁渥而纯美。  
结桂树之旖旎兮，纫荃蕙与辛夷。  
芳若兹而不御兮，捐林薄而菀死。

驱子侨之奔走兮，申徒狄之赴渊。  
若由夷之纯美兮，介子推之隐山。  
晋申生之离殃兮，荆和氏之泣血。  
吴申胥之抉眼兮，王子比干之横废。  
欲卑身而下体兮，心隐恻而不置。  
方圆殊而不合兮，钩绳用而异态。  
欲俟时于须臾兮，日阴曠其将暮。  
时迟迟其日进兮，年忽忽而日度。  
妄周容而入世兮，内距闭而不开。  
俟时风之清激兮，愈氛雾其如塵。  
进雄鸠之耿耿兮，谗介介而蔽之。  
默顺风以偃仰兮，尚由由而进之。  
心忡惶以冤结兮，情舛错以曼忧。  
攀薜荔于山野兮，采撚支于中洲。  
望高丘而叹涕兮，悲吸吸而长怀。  
孰契契而委栋兮，日晡晡而下颓。

叹曰：

江湘油油，长流汨兮。  
挑揄扬汰，荡迅疾兮。  
忧心展转，愁怫郁兮。  
冤结未舒，长隐忿兮。  
丁是逢殃，可奈何兮。

劳心悄悄 涕滂沱兮。

## 忧 苦

悲余心之悄悄兮 哀故邦之逢殃。  
辞九年而不复兮 独茕茕而南行。  
思余俗之流风兮 心纷错而不受。  
遵野莽以呼风兮 步从容于山。  
巡陆夷之曲衍兮 幽空虚以寂寞。  
倚石岩以流涕兮 忧憔悴而无乐。  
登巘岈以长企兮 望南郢而阒之。  
山修远其辽辽兮 涂漫漫其无时。  
听玄鹤之晨鸣兮 于高岗之峨峨。  
独愤积而哀娱兮 翔江洲而安歌。  
三鸟飞以自南兮 览其志而欲北。  
愿寄言于三鸟兮 去飘疾而不可得。

欲迁志而改操兮 心纷结其未离。  
外彷徨而游览兮 内恻隐而含哀。  
聊须臾以时忘兮 心渐渐其烦错。  
愿假簧以舒忧兮 志纡郁而难释。  
叹离骚以扬意兮 犹未憚于九章。  
长嘘吸以于悒兮 涕横集而成行。  
伤明珠之赴泥兮 鱼眼玢之坚藏。  
同驽骀于乘驹兮 杂班駁与 茸。  
葛藟藟于桂树兮 鸱鸢集于木兰。  
偃促谈于廊庙兮 律魁放乎山间。  
恶虞氏之箫韶兮 好遗风之激楚。  
潜周鼎于江淮兮 爨土鬻于中宇。  
且人心之持旧兮 而不可保长。  
遭彼南道兮 征夫宵行。  
思念郢路兮 还顾眊眊。  
涕流交集兮 泣下涟涟。

叹曰：

登山长望 中心悲兮。  
菀彼青青 泣如颓兮。  
留思北顾 涕渐渐兮。

折锐摧矜 凝泛滥兮。  
念我茕茕 魂谁求兮。  
仆夫憔悴 散若流兮。

## 愍 命

昔皇考之嘉志兮 喜登能而亮贤。  
情纯洁而罔穢兮 姿盛质而无愆。  
放佞人与谄谀兮 斥谗夫与便嬖。  
亲忠正之悃诚兮 招贞良与明智。  
心溶溶其不可量兮 情澹澹其若渊。  
回邪辟而不能入兮 诚愿藏而不可迁。  
逐下祿于后堂兮 迎宓妃于伊洛。  
荆逸贼于中廡兮 选吕管于榛薄。  
丛林之下无怨士兮 江河之畔无隐夫。  
三苗之徒以放逐兮 伊皋之伦以充庐。

今反表以为里兮 颠裳以为衣。  
戚宋万于两楹兮 废周邵于遐夷。  
却骐驎以转运兮 腾驴骡以驰逐。  
蔡女黜而出帷兮 戎妇入而彩绣服。  
庆忌囚于阱室兮 陈不占战而赴围。  
破伯牙之号钟兮 挟人箏而弹纬。  
藏珉石于金匱兮 捐赤瑾于中庭。  
韩信蒙于介冑兮 行夫将而攻城。  
莞芎弃于泽洲兮 匏蠹蠹于筐篚。  
麒麟奔于九皋兮 熊羆群而逸囿。  
折芳枝与琼华兮 树枳棘与薪柴。  
掘荃蕙与射干兮 耘藜藿与蕺荷。  
惜今世其何殊兮 远近思而不同。  
或沉沦其无所达兮 或清激其无所通。  
哀余生之不当兮 独蒙毒而逢尤。  
虽謇謇以申志兮 君乖差而屏之。  
诚惜芳之菲菲兮 反以兹为腐也。  
怀椒聊之茝茝兮 乃逢纷以罹诟也。

叹曰：

嘉皇既歿 终不返兮。

山中幽险 郢路远兮。  
逸人谏谏 孰可愬兮。  
征夫罔极 谁可语兮。  
行吟累欷 声喟喟兮。  
怀忧含戚 何佗僚兮。

## 思 古

冥冥深林兮 树林郁郁。  
山参差以崭岩兮 阜杳杳以蔽日。  
悲余心之悄悄兮 目眇眇而遗拉。  
风骚屑以摇木兮 云吸吸以湫戾。  
悲余生之无欢兮 愁倥偬于山陆。  
旦徘徊于长阪兮 夕彷徨而独宿。  
发披披以鬢鬢兮 躬劬劳而瘠悴。  
魂伉伉而南行兮 泣沾襟而濡袂。  
心婵媛而无告兮 口噤闭而不言。  
违郢都之旧闾兮 回湘沅而远迁。  
念余邦之横陷兮 宗鬼神之无次。  
闵先嗣之中绝兮 心惶惑而自悲。  
聊浮游于山狭兮 步周流于江畔。  
临深水而长啸兮 且倘佯而泛观。

兴离骚之微文兮 冀灵修之一悟。  
还余车于南郢兮 复往轨于初古。  
道修远其难迁兮 伤余心之不能已。  
背三五之典刑兮 绝洪范之辟纪。  
播规矩以背度兮 错权衡而任意。  
操绳墨而放弃兮 倾容幸而侍侧。  
甘棠枯于丰草兮 藜棘树于中庭。  
西施斥于北宫兮 卞惟倚于弥楹。  
乌获戚而骖乘兮 燕公操于马圉。  
蒯聩登于清府兮 咎繇弃而在野。  
盖见兹以永叹兮 欲登阶而狐疑。  
乘白水而高骛兮 因徙弛而长词。

叹曰：  
倘佯垆阪 沼水深兮。

容与汉渚 涕淫淫兮。  
钟牙已死 谁为声兮。  
纤阿不御 焉舒情兮。  
曾哀凄欷 心离离兮。  
还顾高丘 泣如洒兮。

## 远 游

悲余性之不可改兮 屡惩艾而不移。  
服觉皓以殊俗兮 貌揭揭以巍巍。  
譬若王乔之乘云兮 载赤霄而凌太清。  
欲与天地参寿兮 与日月而比荣。  
登昆仑而北首兮 悉灵圉而来谒。  
选鬼神于太阴兮 登阊阖于玄阙。  
回朕车俾西引兮 褰虹旗于玉门。  
驰六龙于三危兮 朝西灵于九滨。  
结余轸于西山兮 横飞谷以南征。  
绝都广以直指兮 历祝融于朱冥。  
枉玉衡于炎火兮 委两馆于咸唐。  
贯颶濛以东揭兮 维六龙于扶桑。

周流览于四海兮 志升降以高驰。  
征九神于回极兮 建虹采以招指。  
驾鸾凤以上游兮 从玄鹤与鷖明。  
孔鸟飞而送迎兮 腾群鹤于瑶光。  
排帝宫与罗圃兮 升县圃以眩灭。  
结琼枝以杂佩兮 立长庚以继日。  
凌惊雷以轶骇电兮 缀鬼谷于北辰。  
鞭风伯使先驱兮 囚灵玄于虞渊。  
逝高风以低徊 览周流于朔方。  
就颛顼而陈词兮 考玄冥于空桑。  
旋车逝于崇山兮 奏虞舜于苍梧。  
济杨舟于会稽兮 就申胥于五湖。  
见南郢之流风兮 殒余躬于沅湘。  
望旧邦之黯黯兮 时混浊其犹未央。  
怀兰茝之芬芳兮 妒被离而折之。  
张絳帷以襜襜兮 风邑邑而蔽之。  
日噉噉其西舍兮 阳焱焱而复顾。

聊假日以须臾兮，何骚骚而自故。

叹曰：

譬彼蛟龙，乘浮云兮。

泛淫陨落，纷若雾兮。

潺湲轳，电动雷发，吸高举兮。

升虚凌冥，沛浊浮清，入帝宫兮。

摇翅奋羽，驰风骋雨，游无穷兮。

## 九 思

### 逢 尤

悲兮愁，哀兮忧。

天生我兮当阍时，被谗譖兮虚获尤。  
心烦愤兮意无聊，严载驾兮出戏游。  
周八极兮历九州，求轩辕兮索重华。  
世既卓兮远眇眇，握佩玖兮中路躇。  
羨咎繇兮建典谟，懿风后兮受瑞图。  
愍余命兮遭六极，委玉质兮于涂泥。  
遽倥偬兮驱林泽，步屏营兮行丘阿。  
车轨折兮马虺颓，愆怅立兮涕滂沱。  
思丁文兮圣明哲，哀平差兮迷谬愚。  
吕傅举兮殷周兴，忌谄专兮郢吴虚。  
仰长叹兮气噎结，悒殒绝兮喏复苏。  
虎兕争兮于廷中，豺狼斗兮我之隅。  
云雾会兮日冥晦，飘风起兮扬尘埃。  
走鬯罔兮乍东西，欲窜伏兮其焉如？  
念灵闺兮隩重深，愿竭节兮隔无由。  
望旧邦兮路逶随，忧心悄兮志勤劬。  
魂茕茕兮不遑寐，目眊眊兮寤终朝。

### 怨 上

令尹兮警警，群司兮浓浓。  
哀哉兮淠淠，上下兮同流。  
菽藟兮蔓衍，芳蘼兮挫枯。  
朱紫兮杂乱，曾莫兮别诸。  
倚此兮岩穴，永思兮窃悠。

嗟怀兮眩惑，用志兮不昭。  
将丧兮玉斗，遗失兮钮枢。  
我心兮煎熬，惟是兮用忧。  
进恶兮九旬，复顾兮彭务。  
拟斯兮二踪，未知兮所投。  
谣吟兮中野，上察兮璇玑。  
大火兮西睨，摄提兮运低。  
雷霆碾兮，霰霏兮霏霏。  
奔电兮光晃，凉风兮怆凄。  
鸟兽兮惊骇，相从兮宿栖。  
鸳鸯兮嗷嗷，狐狸兮微微。  
哀吾兮介特，独处兮罔依。  
蝼蛄兮鸣东，蝮蠃兮号西。  
载缘兮我裳，蠋入兮我怀。  
虫豸兮夹余，惆悵兮自悲。  
伫立兮怛怛，心结缡兮折摧。

### 疾 世

周徘徊兮汉渚，求水神兮灵女。  
嗟此国兮无良，媒女诘兮谗譖。  
鸚雀列兮晔，鸕鶿鸣兮聒余。  
抱昭华兮宝璋，欲僂鬻兮莫取。  
言旋迈兮北徂，叫我友兮配耦。  
日阴噎兮未光，闵眊窈兮靡睹。  
纷载驱兮高驰，将谘询兮皇羲。  
遵河皋兮周流，路变易兮时乖。  
沥沧海兮东游，沐盥浴兮天池。  
访太昊兮道要，云靡贵兮仁义。  
志欣乐兮反征，就周文兮邠岐。

秉玉英兮结誓，日欲暮兮心悲。  
惟天禄兮不再，背我信兮自违。  
逾陇堆兮渡漠，过桂车兮合黎。  
赴昆山兮羸馥，从邛遨兮栖迟。  
吮玉液兮止渴，啮芝华兮疗饥。  
居嶮廓兮眇畴，远梁昌兮几迷。  
望江汉兮濯濯，心紧紊兮伤怀。  
时咄咄兮旦旦，尘莫莫兮未晞。  
忧不暇兮寝食，吒增叹兮如雷。

## 悯 上

哀世兮碌碌，浅浅兮嗑啜。  
众多兮阿媚，委靡兮成俗。  
贪枉兮党比，贞良兮茆独。  
鹄窳兮枳棘，鹑集兮帷幄。  
蕪藜兮青葱，藁木兮萎落。  
睹斯兮伪惑，心为兮隔错。  
逡巡兮圃薮，率彼兮畛陌。  
川谷兮渊渊，山阜兮峩峩。  
丛林兮岵岵，株榛兮岳岳。  
霜雪兮淮瀉，冰冻兮洛泽。  
东西兮南北，罔所兮归薄。  
庇阴兮枯树，匍匐兮岩石。  
蜷跼兮寒局数。  
独处兮志不伸，年齿尽兮命迫促。  
魁垒挤摧兮常困辱，含忧强老兮愁不乐。  
须发芟顿兮颡鬓白，思灵泽兮一膏沐。  
怀兰英兮把琼若，待天明兮立踟躅。  
云蒙蒙兮电倏烁，孤雌惊兮鸣响响。  
思怫郁兮肝切剥，忿悁悒兮孰诉告？

## 遭 厄

悼屈子兮遭厄，沈玉躬兮湘汨。  
何楚国兮难化，迄于今兮不易。  
士莫志兮羔裘，竟佞谀兮谗阋。  
指正义兮为曲，诋玉璧兮为石。

殒雕游兮华屋，馭栖兮柴簇。  
起奋迅兮奔走，违群小兮谗询。  
载青云兮上升，适昭明兮所处。  
蹶天衢兮长驱，踵九阳兮戏荡。  
越云汉兮南济，秣余马兮河鼓。  
云霓纷兮晦翳，参辰回兮颠倒。  
逢流星兮问路，顾我指兮从左。  
径嫩觜兮直驰，御者迷兮失轨。  
遂踢达兮邪造，与日月兮殊道。  
志阨绝兮安如，哀所求兮不耦。  
攀天阶兮下视，见鄙野兮旧宇。  
意逍遥兮欲归，众秽盛兮杳杳。  
思哽噎兮诘讵，涕流澜兮如雨。

## 悼 乱

嗟嗟兮悲夫，殒乱兮纷拏。  
茅丝兮同综，冠履兮共纆。  
督万兮侍宴，周邵兮负刍。  
白龙兮见射，灵龟兮执拘。  
仲尼兮困厄，邹衍兮幽囚。  
伊余兮念兹，奔遁兮隐居。  
将升兮高山，上有兮猴猿。  
欲入兮深谷，下有兮虺蛇。  
左见兮鸣鸱，右睹兮呼枭。  
惶悸兮失气，踊跃兮距跳。  
便旋兮中原，仰天兮增叹。  
菅蒯兮野莽，藿苇兮仟眠。  
鹿蹊兮，獠貉兮蟬蟬。  
鸱鸢兮轩轩，鹞鹞兮甄甄。  
哀我兮寡独，靡有兮齐伦。  
意欲兮沈吟，迫日兮黄昏。  
玄鹤兮高飞，曾逝兮青冥。  
鸬鹚兮啾啾，山鹊兮嚶嚶。  
鸿鹄兮振翅，归雁兮于征。  
吾志兮觉悟，怀我兮圣京。  
垂厯兮将起，跼蹐兮硕明。

## 伤 时

惟昊天兮昭灵，阳气发兮清明。  
风习习兮和暖，百草萌兮华荣。  
董荼茂兮扶疏，蘅芷凋兮莹嫫。  
愍贞良兮遇害，将夭折兮碎糜。  
时混混兮浇饷，哀当世兮莫知。  
览往昔兮俊彦，亦诎辱兮系累。  
管束缚兮桎梏，百贸易兮傅卖。  
遭桓缪兮识举，才德用兮列施。  
且从容兮自慰，玩琴书兮游戏。  
迫中国兮窄狭，吾欲之兮九夷。  
超五岭兮嵯峨，观浮石兮崔嵬。  
陟丹山兮炎野，屯余车兮黄支。  
就祝融兮稽疑，嘉己行兮无为。  
乃回謁兮北逝，遇神媿兮宴媿。  
欲静居兮自娱，心愁戚兮不能。  
放余辔兮策驷，忽飚腾兮浮云。  
蹠飞杭兮越海，从安期兮蓬莱。  
缘天梯兮北上，登太一兮玉台。  
使素女兮鼓簧，乘弋和兮讴谣。  
声噉兮清和，音晏衍兮要媿。  
咸欣欣兮酣乐，余眷眷兮独悲。  
顾华章兮太息，志恋恋兮依依。

## 哀 岁

旻天兮清凉，玄气兮高朗。  
北风兮凛冽，草木兮苍唐。  
蚍蜉兮噉噉，螂蛆兮穰穰。  
岁忽忽兮惟暮，余感时兮凄怆。  
伤俗兮泥浊，矇蔽兮不章。  
宝彼兮沙砾，捐此兮夜光。  
椒瑛兮涅污，耳兮充房。  
摄衣兮缓带，操我兮墨阳。  
升车兮命仆，将驰兮四荒。  
下堂兮见蛭，出门兮触蜂。

巷有兮蚰蜒，邑多兮螿螂。  
睹斯兮嫉贼，心为兮切伤。  
俯念兮子胥，仰怜兮比干。  
投剑兮脱冕，龙屈兮蜿蟺。  
潜藏兮山泽，匍匐兮丛攒。  
窥见兮溪涧，流水兮沄沄。  
鼋鼉兮欣欣，鱣鮪兮延延。  
群行兮上下，骈罗兮列陈。  
自恨兮无友，特处兮茕茕。  
冬夜兮陶陶，雨雪兮冥冥。  
神光兮 鬼火兮荧荧。  
修德兮困控，愁不聊兮遑生。  
忧纡兮郁郁，恶所兮写情。

## 守 志

陟玉峦兮逍遥，览高冈兮峣峣。  
桂树列兮纷敷，吐紫华兮布条。  
实孔鸾兮所居，今其集兮惟鴞。  
乌鹊惊兮啞啞，余顾瞻兮怊怊。  
彼日月兮闇昧，障覆天兮褻氛。  
伊我后兮不聪，焉陈诚兮效忠。  
摅羽翮兮超俗，游陶遨兮养神。  
乘六蛟兮蜿蟺，遂驰骋兮升云。  
扬慧光兮为旗，秉电策兮为鞭。  
朝晨发兮鄱郢，食时至兮增泉。  
绕曲阿兮北次，造我车兮南端。  
谒玄黄兮纳贄，崇忠贞兮弥坚。  
历九宫兮遍观，睹秘藏兮宝珍。  
就傅说兮骑龙，与织女兮合婚。  
举天毕兮掩邪，彀天弧兮射奸。  
随真人兮翱翔，食元气兮长存。  
望太微兮穆穆，睨三阶兮炳分。  
相辅政兮成化，建烈业兮垂勋。  
目瞿瞿兮西没，道遐迥兮阻叹。  
志蓄积兮未通，怅敞罔兮自怜。

乱 曰

斥蜥蜴兮进龟龙 ,策谋从兮翼机衡。  
配稷契兮恢唐功 ,嗟英俊兮未为双。

天庭明兮云霓藏 ,三光朗兮镜万方。